

Jon

Od Anĩ Tamo Wõ Yen

¹ Gariya bun Od anĩ ibodon, Od anĩ Negur ado dibodon, Od anĩ Negur. ² Gariya bun ã Negur ado dibodon.

³ Ñ bunem ereb ereb ganan inon, Od anĩ sã bun ereb inodin taka to ibodok. ⁴ Mata ã bun ibodon, mata anĩ tamo neid fula fiya. ⁵ Fula fiya anĩ gugum bun lalan ifenek, anĩ ere, gugum ã fula fiya anĩ to kelein.

⁶ Tamo taka Negurem sur fe di, isin, ã yana Jon. ⁷ Ñ fula fiya anĩ yaor fe, kurõ fesiyouf nigin isin, are tamo kayau ganan ã bunem momoi douf nigin age fen. ⁸ Ñ anĩ fula fiya sã, ã fula fiya anĩ kurõ fesiyouf nigin isin. ⁹ Fula fiya bagai yogo tamo kayau ganan lalan ifenēdif, ã tenebur isin.

¹⁰ Ñ teneub bun ibodon, are ã bunem teneub inon, anĩ ere, tamo kayau tenebur ein, ã to kelein. ¹¹ Ñ yogon bagai anidi bun isin, anĩ ere, yogon bagai anidi ã to daleyen. ¹² Anĩ ere, idi ã daleyen, ã yana nigin momoi den anidi bun, Negur idi Negur nē gere tar wowã douf nigin igirnēdin. ¹³ Sina tama nē naud bunem to Negur gere tar wowã den, bouwa nē oroya bunem sã, tamo nē wau irõya buneg sã, anĩ ere, Negur yogo age fe di, wowã den.

¹⁴ Od anĩ tamo wõ ye fen, ada atun ibodon. Ada yogon fula fiya medeĩa tailen, fula fiya medeĩa

are Naal Tekelei Yogo Dogol nê, ï Tama bun tamal wau ifenêya ado momoi barikã isin.

¹⁵ Jon ï nigin kurō falaisi wogō yen. Ï iweig fen, iron, “Ï enei nigin aya arokenein, ‘Taka ï aya dumeun isif, ï aya wal fiyaya, ere nigin, ï ket ibodon.’ ” ¹⁶ In wau ifenêya barikã bunem, ada adok el fiya tale fen, anĩ teten el fiya musei talen.

¹⁷ Are Moses bunem lo anĩ talen, anĩ ere, wau ifenêya ado momoi anĩ, Jesus Kristus bunem isin.

¹⁸ Taka nem Negur to bagai ilen, anĩ ere, Negur Naal Tekelei Yogo Dogol, ï Tama wagen ibod ken, ï nigin yaor fen.

Jon Naan Igunêdiya Tamo Ï Yogo Nigin, Aya Kristus Sã, Yen

(Matyu 3:1-12; Mak 1:1-8; Luk 3:1-18)

¹⁹ Juda tamo Jerusalem temeleid idim, pris tunĩ, Lewi nê ibor geid sur difedi di, Jon ï aim yeya anĩ to difiyê di, Jon ï eig ye kurō fesin. ²⁰ Ï wa fiya sã, kurō falaisi, “Aya Kristus sã,” yen.

²¹ Idi ï to difiyen, “Age fiyauf are, õ ai? Õ Eliya de?”

Ï iron, “Aya ï sã.”

Idi diron, “Õ Profet amã tari mafef anim de?”

Ï iron, “Sã.”

²² Age ye di, idi diron, “Õ ai bagai? Õ amã urokanamã len, idi amã sur difaman anidi gein ke ma malauf. Õ ogo nigin ere wof?”

²³ Jon profet Asaia nê od bun solof iron, “Aya anĩ, ait taka gerere tuan iweig irok, ‘Odug nê naab madur gouf.’ ”*

* **1:23:** Asaia 40:3

²⁴ Farisia tamo tunĩ sur difedin anidim ²⁵ to difiyen, “Õ Kristus sãf, Eliya sãf, Profet anĩ sãf are, ere nigin naan ugunẽdif?”

²⁶ Jon aitedin yale iron, “Aya naan nem naan agunẽdif, anĩ ere, ã atun, taka ã keleĩ sã anĩ ifaref.

²⁷ Ì anĩ aya dumeun dõ fiyaf, aya to biya nigin, in ye su nẽ malũ biru fediya kisi feleya sã.”

²⁸ Enei ganan Betani oun Jordan naan sitakã, Jon naan igunẽdin nẽ an wõ yen.

Jesus, Negur Nẽ Sipsip Naal

²⁹ Naa taka di, Jon, Jesus wagen iyok isi mog, ile fen, iron, “Ulegef, Negur nẽ Sipsip Naal, ì tamo ganan neid mosor yaledif! ³⁰ Enei nigin au fen, oron, ‘Taka ì aya dumeun isif, ì aya wal fiyaya, ere nigin, ì ket ibodon.’ ³¹ Aya yug ì keleĩ san, anĩ ere, aya asi, naan nem naan agunẽdif nẽ gariya are, Israel tamo kayau bun ì yaor foun nigin.”

³² Age ye fen, Jon enei kurõ feis iron, “Aya, Awa Uur saa ilun tamal kuburir gen isi, ì bun ibod mog, ailen. ³³ Aya ì to kelein, anĩ ere, taka ì, aya naan nem naan agunẽdiyof nigin sur fiyan im irokanan, ‘Tamo anĩ, Awa Uur isi, ì bun ibod mog, ulouf, im Awa Uur Fateul nem naan igunẽdiyof.’

³⁴ Aya ailen nigin kurõ afeis, ‘Ei Negur Naal,’ auf.”

Jesus In Dõ Fiya Tar Uyulil Iweignẽdin

³⁵ Naa taka di, Jon, in dõ fiya tar uru geid, baban an difaren. ³⁶ Ì, Jesus isi ile di, ile fen, ì iron, “Ulegef, Negur nẽ Sipsip Naal!”

³⁷ Sain Jon nẽ dõ fiya tar uru enei karĩ de fen, idi Jesus dõ difiyen. ³⁸ Jesus falei yel, idi ì dõ difiyẽ mog, ile fen, to fedin, “Ã ere oroyeik?”

Idi diron, “Rabi (anĩ nẽ gariya, Tise), õ nain ubodõdig?”

³⁹ Ì iron, “Umag fen, ulogouf.”

Age ye di, idi dile, ì ibodõdig anĩ dile fen, naa anĩ bun, ì geid dibodon. Are aragau fo kilok age fiya.

⁴⁰ Endru, Simon Pita ne tura ì, idi uruwom erob Jon wogõ yen anĩ karĩ de fen, Jesus dõ difiyen anĩ taka. ⁴¹ Ereb uruwa Endru age fen are, ì tura Simon imir ile fen, irokenen, “Amã Mesia (anĩ Kristus) fotou mafen.” ⁴² Age ye fen, Endru, Pita Jesus wagen irou ile di,

Jesus Pita lo fiye ken, iron, “Õ Simon, Jon naal. Õ yanã Sifas douf” (Sifas falei fiyauf are, Pita).

Jesus Filip Nataniel Ado Iweignẽdin

⁴³ Naa taka di, Jesus Galili ileya nigin kisif fen, Jesus Filip fotou fiye ken, irokenen, “Aya dõ wiya.”

⁴⁴ Filip ì, Endru Pita ado geid, Betsaida taun temeleid. ⁴⁵ Filip Nataniel fotou fiye ken, ì irokenen, “Amã ì nigin Moses nẽ Lo bun itoton ado profet idig ditoton, Jesus Nasaret tamal, Josef naal anĩ, fotou mafen.”

⁴⁶ Nataniel to fen, “Nasaret! Ereb biya taka, anenem wõya nigin kisi feleya de?”

Filip iron, “Usi ule.”

⁴⁷ Sain Jesus Nataniel non iyok isi mog, ile fen, ì nigin iron, “Eĩ Israel tamo bagai, ì bun erob idegẽya taka sã.”

⁴⁸ Nataniel Jesus to fiyen, “Naig wo fen, õ aya kelei?”

Jesus aiten yale iron, “Aya õ Filip iweignõya sã mog, aa fig farumen ubod mog, ailiyon.”

⁴⁹ Age ye di, Nataniel Jesus irokenen, “Rabi, ò Negur Naal, ò Israel neid King.”

⁵⁰ Jesus iron, “Aya ò aa fig farumen ailiyon aul nigin, ò momoi wof. Ò anī wal fiya ereb ereb odug ulouf.” ⁵¹ Ī tobol fe iron, “Aya ā momoi bagai arokeneik, ā, saa bobog kā fele di, Negur nē engel Tamo Naal bun diselef disif dife mog, ulogouf.”

2

Jesus Irō Di, Naan Wain Falei Felen

¹ Naa uru bure fele di, naa towo bun, tamo kayau ado bagu fiya, Galili distrik oun Kana fonō wō yen. Jesus sinag an ibodon. ² Jesus in dō fiya tar geid idig, tamo kayau ado bagu fiya bun diweignēdin. ³ Sain wain sa kele di, sinam Jesus irokenen, “Idi wain taka sã.”

⁴ Jesus iron, “Kayau, ò ere nigin aya kababal wiyaf? Neu sain fau isiya sã.”

⁵ Jesus sina, kabī tamo irokenēdin, “Ereb ĩ irokeneĭf anī dōg, ago gouf.”

⁶ Nodin meein gulub sigis naan ifotūya nē difaren, are Juda neid tobonuneid bun imeid kulo fiya nigin, idi teke tekelei 100 lita age fiya naan iroudig.

⁷ Jesus kabī tamo irokenēdin, “Gulub bun naan utinēdig.” Age ye di, idi ditineĭd eweid gere fesedin.

⁸ Age difele di, Jesus idi irokenēdin, “Gama tunī lolob ge fen, sifa marau uroule kenēg.”

Age ye di, idi age difen. ⁹ Sifa marau naan wain falei fen anī yō ilen. Ī wain anī nainenem be isin anī to kelein, anī ere, kabī tamo naan lolob

difen idi kelein. Agef fen, sifa marau ã, kayau marau yerin iweignẽ, ile di, ¹⁰ irokenen, “Ganan idi wain biya anĩ ket dirousi di, tamo disif idi anĩ fatuk dõ mog, to biya gen anĩ dum dirousidig, anĩ ere, õ biya bagai urou ubodom anĩ, gama bagai urousif.”

¹¹ Jesus memelik gariya inon are enei bun, oun Galili distrik Kana fonõ. Anĩ bun, ã yogon fula fiya medeïya yaor fe di, yogon dõ fiya tar dogo neid momoiya ã bun dinon.

Jesus Tempel Waï Fen

(Matyu 21:12, 13; Mak 11:15-17; Luk 19:45, 46)

¹² Enei bure fele di, Jesus ã, sina, tura tar ado, yogon dõ diya tar geid, Kapenaum disilen. An naa musei to dibodon.

¹³ Juda neid Pasa naa sain melsã mog, Jesus Jerusalem iselen. ¹⁴ Tempel modoũ bun, tamo, bulmakau, sipsip ado, kuburir na sur difeid fen, tunĩg tebol bun dibod ken, moni solo de mog, iledin. ¹⁵ Anĩ ile fen, ã malũ nem wip inon, agef fen, tempel modoũ bun tamal, sipsip ado bulmakau ganan irudi di, serẽ dilelen, ã moni solo fiya tamo neid koin moni daũf firagagaũ fe fen, ã dogo neid tebol yale, falei feledin. ¹⁶ Idi kuburir na sur difen anĩ irokenẽdin, “Eneidi ein waleledig, neu Dei nẽ fõ anĩ maket modoũ to unog!”

¹⁷ Dum in dõ fiya tar, eig ye itotoya anĩ nigin wedereid fokõ yen, “Ogon fõ nigin wau itenẽya anim nameun isainaf.”*

* **2:17:** Sam 69:9

¹⁸ Age ye di, Juda tamo Jesus dirokenen, “Ere memelik anī ufelnamã di, enei ganan agof anī nigin ò igirīya ado mauf?”

¹⁹ Jesus idi irokenēdin, “Tempel enei narī weleg len, naa towo bun baban alesauf.”

²⁰ Juda tamo diron, “Tempel enei dinon are, foti-sigis yar yalen, anī ò naa towo bun walesauf de?” ²¹ Anī ere, tempel ī wogō yen are, yogo bouwa nigin. ²² Ī laa bunem kel fã yen anī bure fele di, in dō fiya tar, ī iron anī, wedereid fokō yen. Anī bunem, idi Negur nē Itotoya ado Jesus wogō yen anī nigin momoi den.

²³ Gama ī Jerusalem oun sain Pasa Sifa bun ibod ken, tamo kayau musei memelik inodin anī dilen, anī bun ī yana nigin momoi den. ²⁴ Anī ere, Jesus ī yogo bagai, idi nigin to momoi yen, ere nigin, ī tamo ganan nigin keleī. ²⁵ Jesus ī, tamo takam taka nigin ī irokenēya anī kisi feleya san, ere nigin, ereb tamo name bun ibodok, ī yogo keleī.

3

Jesus Nikodemus Ifelnen

¹ Farisia tamo taka, yana Nikodemus ibodon, ī Juda uyu irouya neid kaunsel taka. ² Ī bō Jesus wagen isi fen, iron, “Rabi, amã keleī, ò tise Negur bunem usin. Ere nigin, taka nem Negur ī ado to ibodōf are, memelik ò unodif anī inodiya kisi feleya sã.”

³ Jesus aiten yale iron, “Aya ò momoi bagai arokonok, taka nem Negur nē tano to ilouf, ī baban mata gō fiyēf dogol.”

⁴ Nikodemus Jesus to fiyen, “Tamo ï biyan anï, sina naig fe baban gō foug? Momoi bagai, ï sina namen baban ile di, gō fiyēya kisi feleya sã!”

⁵ Jesus solof iron, “Aya õ momoi bagai arokonok, taka ï, naan ado Awa Uurem mata to wõ youf are, ï Negur nē tano bun ileya kisi feleya sã. ⁶ Bouwam gō fef are, bouwa nē, anï ere, Awa Uurem gō fef are, uur nē. ⁷ Õ neu od eig au wogõ auf bun, kisi to gurũ wouf, ‘Ã de baban mata wõ gouf.’ ⁸ Yau in oroya bun isi iledig. Õ ait dogol karï wodig, anï ere, õ nainenem isif be, nain be ilef, to keleï youf. Ganan idi Awa Uurem gogũ fedif are, age fiya bagai.”

⁹ Nikodemus Jesus to fiyen, “Are naig fe, agef wõ youf?”

¹⁰ Jesus iron, “Õ Israel neid tise, anï ere, õ enei to keleik de? ¹¹ Aya õ momoi bagai arokonok, ereb amã keleï anï wogõ mauf, age ma fen, ereb amã mailen anï kurõ mafesif, anï ere, tamo kayau ã fau amã nemã od to walegef. ¹² Aya ã ereb tenebur tamal nē anï wogõ ayeik, anï ere, ã to momoi gef, saa ilun tamal nē anï wogõ ayeïfeg, naig ge momoi gouf? ¹³ Aibem taka saa ilun to iselen, Tamo Naal saa ilunem isin yogo dogol. ¹⁴ Moses gerere tuan gogour yalesen, age fiya bagai, Tamo Naaleg age de dalesnēf. ¹⁵ Are ganan idi ï nigin momoi def, mata faimud ibodkeleya adouf nigin.

¹⁶ “Negur, tamo kayau teneub enei bun ganan nigin fatuk wau laa fen nigin, yogon Naal tekelei bagai anï ifenēdin, are taka ï, ï nigin momoi youf are, to fõ yalauf, mata faimud ibodkeleya adouf

nigin age fen. ¹⁷ Negur ã, yogon Naal teneub enei bun, tamo kayau es fediya nigin to sur fen, ã bunem tamo kayau teneub enei bun, kel gei foug nigin sur fen. ¹⁸ Taka, ã nigin momoi yef are, to es fiyek, anã ere, taka, ã nigin momoiya sã are, ã mogo es fiya bun ifaref, ere nigin, ã Negur Naal tekelei bagai yana nigin to momoi yen. ¹⁹ Foi fiya eig fiya, fula fiya teneub enei bun mogo isin, anã ere, tamo idi dogo neid tobonuneid sane nigin, fula fiya ditor ken, gugum nigin waud laa fen. ²⁰ Tamo idi sane age difef are, lalan to orodidig, ere nigin, dogo neid tobonuneid sane anã yaoreya kumã de fen, lalan namen to disiyouf. ²¹ Anã ere, aib taka ã momoi bun age fef, lalan namen isidig, age fe di, ereb ã age fen are, Negur bunem age fen anã, yaor dilouf.”

Jon Naan Igunẽdiya Tamo, Jesus Nigin Kurõ Fesin

²² Anã bure fele di, Jesus in dõ fiya tar geid, Judia teneub bun dilen, an ã idi geid sain naal dibod ken, naan igunẽdin. ²³ Joneg Ainon Salim non naan igunẽdin, ere nigin, an naan musei bagai, anã nigin, tamo kayau naan igunẽdiyof nigin toku disidig. ²⁴ (Are Jon fau kalabus bun to dinenẽ mog.) ²⁵ Jon nẽ dõ fiya tar tunã, Juda tamo taka geid, dogo neid tobonuneid dõ de fen, imeid kulo difedig anã nigin luwa diroun. ²⁶ Idi Jon wagen disi dirokenen, “Rabi, tamo õ uruwom Jordan naan sitakã ufareg fen, ã nigin kurõ weis uron, ã naan igunẽdif, age fe di, ganã ã bun dilef.”

²⁷ Jon solof iron, “Tamo ã, ereb saa ilun tamal ifenek anã dogol yalouf. ²⁸ ã aug aya oron anã

sã kurõ walaisi gef, ‘Aya Kristus sã, anĩ ere, aya ĩ ket sur fiyan.’ ²⁹ Mois kayau are, mois tamo nẽ. Mois nẽ mou ĩ, bagu fiya bun ifar fen, karĩ fiyek, ĩ mois tamo nẽ ait anĩ karĩ ye fen, kulĩya odug ado. Kulĩya are neu, anĩ gama kisi felef. ³⁰ ĩ yana odug iseles di, aya yanau tenebur isilauf.

³¹ “Taka ĩ ilunem isif, ĩ ganan wal fiya, taka ĩ tenebur tamal are, tenebur nẽ, anĩ nigin, tenebur nẽ anĩ wogõ yedig. Taka ĩ saa ilunem isif, ĩ ganan wal fiya. ³² Ereb ĩ ilen ado karĩ yen anĩ, kurõ falaisif, anĩ ere, yogon od taka nem to yalef. ³³ Taka ĩ yogon od yalen anim, Negur ĩ momoi bagai ye fen, anĩ megeir ifenen. ³⁴ Taka ĩ Negurem sur fiyen are, ĩ Negur nẽ od wogõ yef, ere nigin, Negur ĩ Awa Uur idikeleya sã ifenek. ³⁵ Tama ĩ Naal nigin wau laaf fen, ererb ererb ganan ĩ ima bun inon. ³⁶ Aib ĩ Naal nigin momoi yef are, mata gai ibodkeleya ado, taka ĩ Naal nigin itorok are, ĩ mata to ilouf, Negur nẽ didi ĩ bun ibodok.”

4

Jesus Samaria Kayau Ado Wogõ Den

¹ Jesus Jon wal fiye ken, in dõ fiya tar musei geif naan igunẽdif ya anĩ, Farisia tamo karĩ den. ² Anĩ ere, momoi bagai Jesusem naan igunẽdiya sã, are in dõ fiya tar anidim. ³ Sain Odug enei kelei ken, ĩ Judia distrik itor ken, baban Galili kel ilen.

⁴ Gama ĩ Samaria atu ilauf. ⁵ Anĩ nigin, ĩ Sikar taun oun Samaria, Jakop, ne naal Josef teneub kulu ifenen non, iyok isin. ⁶ An Jakop nẽ naan ifotokon tutuwõ ibodon, Jesus naab meluk iyok

isi, tuwa yu kele di, naan ifotokon tutuwõ sirin ibodon. Are mogo gaa atun age fiya.

⁷ Agef mog, Samaria kayau taka naan ifotüya nigin isi di, Jesus kayau irokenen, “Aya naan tau wana di, ãf.” ⁸ (In dô fiya tar, taun saaf na yaleya nigin dilelen.)

⁹ Samaria kayau Jesus irokenen, “Õ Juda tamo di, aya Samaria kayau. Naig fe di, ayam õ naan afon, wãf nigin to wiyaf?” (Juda tamo kayau idi, Samaria tamo kayau geid to uyu katõ difedig.)

¹⁰ Jesus kayau irokenen, “Õ safina ege luwa Negur ifonok ado, aibem naan nigin to yok anĩ keleim are, õ ã to wiyẽ di, mata ifenëya nẽ naan anĩ ifonom.”

¹¹ Kayau iron, “Odug, õ ifotüya nẽ safina sã, naan ã ilon bagai. Õ mata ifenëya nẽ naan are nain walouf? ¹² Tamamã Jakop naan ifotok kanama ken, ã yogog gere tar ado gaareg anĩ bun don, õ ã wal fiya de?”

¹³ Jesus kayau aiten yale iron, “Ganan naan enei doko, idi baban naan ail fediyouf. ¹⁴ Anĩ ere, taka ã aya naan anĩ afenẽ di, yoko, ã baban to bagai naan ail fouf. Naan aya ã afenek, warur naan ã namen faimud ulo ulõ yef yenẽ di, anim mata gai ibodkalauf.”

¹⁵ Kayau Jesus irokenen, “Odug, naan enei wanauf, ago di, aya baban naan ail to fiya fen, naan enei bun ifotüya nigin toku ein to kelauf.”

¹⁶ Ì kayau irokenen, “Ule, ogon tamo uroken ken, kel usig.”

¹⁷ Kayau iron, “Aya tamo sã.”

Jesus kayau irokenen, “Õ tamo sã wof are, õ tutuk urok. ¹⁸ Ere nigin, õ mogo tamo faif adon, tamo gama õ ado are, ogon aiwã sã. Õ ogo urom, are momoi bagai.”

¹⁹ Kayau iron, “Odug, aya õ ailiyok, õ profet taka. ²⁰ Amã tamamã tar, arei enei bun Negur yana dalesedig, anĩ ere, Juda ã urõgedig, Negur yana yaleseya modoũ are oun Jerusalem dogol.”

²¹ Jesus kayau irokenen, “Kayau, aya momoi wiya, sain fau isi di, baban arei enei bun ado, Jerusalemeg an, Dei yana to walesagauf. ²² Samaria ã, ereb ã keleĩ sã anĩ yana walesegedig, amã ereb amã keleĩ anĩ yana malesedig, ere nigin, tamo kayau kel yaleya nẽ are, Juda ibor bun tamal. ²³ Sain isiyouf are, gama mogo yeir isil, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fediya anĩ Dei ã imirnẽdif. ²⁴ Negur ã uur, anĩ nigin, ã yana dalesedig idi, uur ado momoi bunem, yana dalesauf.”

²⁵ Kayau iron, “Aya keleĩ, Mesia (Kristus dedig) fau isif. ã isiyouf sain bun, ereb ereb ganam faded famãf.”

²⁶ Age ye di, Jesus kayau irokenen, “Aya inim yeir od ayok.”

Jesus Nẽ Dõ Fiya Tar Keku De Disi, Jesus Geiden

²⁷ Agef mog bagai, in dõ fiya tar keku de disì, Jesus kayau anĩ ado od de mog, dileid fen, terẽ den. Anĩ ere, taka nem to, to fiyen, “Õ ere oroyok?” be “Õ ere nigin ã ado od gef?”

²⁸ Kayau, ne naan gulub itor yen, taun kel ile, tamo kayau irokenẽdin, ²⁹ “Umag, tamo taka, aya

ereb ereb ganan age afef asin irokanal anĩ uleg. Ī anĩ Kristus be.” ³⁰ Idi taun ditor disi, Jesus garan dilen.

³¹ Age de mog, in dō fiya tar Jesus total bagai dirokenen, “Rabi, ereb taka wō.”

³² Anĩ ere, ĩ idi irokenēdin, “Aya saaf ā keleĩ sã anĩ āf nigin ado.”

³³ Age ye di, in dō fiya tar abob dirokenen, “Taka nem mogo saaf irousi ifenem de?”

³⁴ Jesus iron, “Neu saaf are, aya sur fiyan in oroya dō afe fen, in kabĩ bure afalauf anĩ. ³⁵ Ā eig ge to urōgedig de, ‘Ogō fo bure fele di, kusu fiya sain wō youf’? Aya ā arokeneik, meleĩ fara weleg fen, kabĩ onoudi ulogouf! Idi mogo kusu fiya nē mayo bure felen. ³⁶ Kusu fiya tamo ĩ gama mala solo yalef, ĩ gama mata faimud ibodkeleya nē biya kusus fef, anĩ bun, itenēya tamo ado kusu fiya tamo waud al fouf. ³⁷ Anĩ nigin, od enei momoi bagai, ‘Tamo takam itenēdig, tamo takam kusu fedig.’ ³⁸ Aya, ā kabĩ to walegen nē an, kusu fiya nigin sur ayein. Tunim kabĩ total dalen, anĩ ā idi neid maab mala anĩ kusu gen.”

Samaria Tamo Kayau Musei Momoi Den

³⁹ Samaria tamo kayau, taun anĩ bun temeleid musei, ĩ nigin momoi den, ere nigin, kayau anĩ eig ye kurō fesin, “Ī ereb ereb ganan age afef asin anĩ irokanal.” ⁴⁰ Anĩ nigin, Samaria tamo kayau ĩ gein disi, ĩ idi geid dibodōf nigin total bagai dirokenē di, ĩ naa uru, idi geid dibodon. ⁴¹ In od bunem, musei fau fau momoi den.

⁴² Idi kayau anĩ dirokenen, “Amã ogon od bun dogol to momoi mauf, ere nigin, amã mug karĩ

mau fen, amã kelei, tamo enei momoi bagai teneub ganan enei nẽ Isennẽya.”

Jesus, King Nẽ Kabĩ Mudur Naal El Fiyen

⁴³ Naa uru bure fele di, Jesus Galili ilen. ⁴⁴ Jesus ã yogo iron, ‘Profet taka, yogon fõ gariyan, ã yana sã.’ ⁴⁵ Sain ã Galili wõ yen, Galili tamo kayau ã daleyen. Idi Jerusalem Pasa Sifa bun, ã er eb er eb age fen ganan dilen, ere nigin, idig an weim difaren.

⁴⁶ ã baban Galili distrik oun Kana fonõ ki fen, kulu an ã naan wain falei felen. Sain anĩ bun, king nẽ kabĩ mudur taka nẽ naal Kapenaum taun an dagi yenen. ⁴⁷ Tamo enei, Jesus Judia distrik tamal Galili isin anĩ karĩ ye fen, ã Jesus gein ile, ne naal laa melsã yenen anĩ, isi el fiyẽf nigin igonen.

⁴⁸ Jesus ã irokenen, “Ã memelik uris ado anĩ to ulogouf are, ã to bagai momoi gouf.”

⁴⁹ King nẽ kabĩ mudur iron, “Odug, neu kesu fau laa fiya sã mog, õ usiyouf.”

⁵⁰ Jesus ã irokenen, “Õ wadã ule. Õ naal fau mata ibodõf.”

Tamo anĩ, Jesus nẽ od momoi ye fen, ilen. ⁵¹ ã fau naab iyok ile mog, yogon ferfer ã fotou difiye ken, yogon kesu mata ibodok anĩ wogõ difiyen. ⁵² Age de di, ã gaa mala ganĩ bun, ne naal dagi karikan anĩ to fiyẽdin. Idi ã dirokenen, “Bouwa uruwa, nor wan kilok aragau folõ fiye kelen.”

⁵³ Age de di, tama ã kelein, sain anĩ bun bagai, Jesus irokenen, “Õ naal fau mata ibodõf.” Anĩ nigin, ã yogo, ne fõ tura tar ganan geid, momoi den.

⁵⁴ Jesus Judia distrik bun tamalem Galili isi fen, memelik inon, are eneim anĩ uru.

5

Jesus Dagi Tamo Betesta Naan Kolili Fiyen El Fiyen

¹ Dum, Jesus Juda neid sifa bun Jerusalem iselen. ² Jerusalem an Sipsip Bobog non, naan kolili fiya taka Hibru od nem Betesta dedig ibodok, naan kolili fiya anĩ sirin meein torem fõ faif dinodin dibodok. ³ An dagi tamo kayau musei denenādig, meleid ifofakeleya, yeid kirorōya, bouweid ilolaisidin.* ⁵ Difaren nē an, tamo taka dagi ado ibodok ile, teti-eit yar yalen. ⁶ Sain Jesus ĩ an yen mog, ile fen, ĩ sain meluk dagi ado an yenen anĩ kelei ken, ĩ to fiyen, “Õ biya leya oroyok de?”

⁷ Dagi tamo iron, “Odug, sain naan moyõ fe di, taka nem isenna di, naanũ isileya to ibodok. Aya asilauf au mog, taka ketem uyu wal fiya fen, isiledig.”

⁸ Age ye di, Jesus ĩ irokenen, “Fã wo! Ogon gogoũ wenēdig anĩ wale fen, uyok ule.” ⁹ Age ye di, tamo kaisã bagai dagi sa kele di, ĩ yogon gogoũ yale fen, iyok ilen.

Anĩ wõ yen naa are, Sabat naa. ¹⁰ Anĩ nigin, Juda tamo idi, tamo dagi sa kelen anĩ dirokenen, “Naa eĩ Sabat naa.† Õ ogon gogoũ irouya nigin lo

* **5:3:** Itotoya tunĩ eig de ditoton: ilolaisidin. Idi naan moyõ foug nigin tari difedig. ⁴ Sain taka taka Odug nē engel taka isi, naan moyõ fedig. Taka ĩ moyõ mugu mugu ile fen, ĩ ket naanũ isilef, ĩ ereb dagi ado are el feledig. † **5:10:** Sabat naa anĩ, Juda neid uub nē naa.

katũ yef.”

¹¹ Anĩ ere, ĩ aitedin yale iron, “Tamo ĩ el fiyal anim, ‘Ogon gogoũ wenēdig anĩ wale fen, uyok ule,’ fiyal.”

¹² Anĩ nigin, idi ĩ to difiyen, “Tamo enei nanim, ‘Ogon gogoũ wale fen, uyok ule,’ yom?”

¹³ Tamo el fiyen, ĩ aib ya anĩ nene yelen, ere nigin, Jesus ĩ an guru difen anĩ namen iwaikelen.

¹⁴ Dum Jesus tamo anĩ tempel bun fotou fiye ken, irokenen, “Ulef, õ baban biya lel. Baban mosor to uno, are ereb sane bagai uruwa nē wal fiya anĩ, õ bun to wõ youf nigin.” ¹⁵ Tamo are ile, Juda tamo irokenēdin, ‘Aya el fiyal tamo are Jesus,’ yen.

Negur Naal Bunem Mata Ibodõya

¹⁶ Jesus Sabat naa bun enei age fedig nigin, Juda tamo idi ĩ morõ difenen. ¹⁷ Jesus idi irokenēdin, “Neu Dei ĩ faimud kabĩ yalef isi, gama naa enei buneg kabĩ yalef, anĩ nigin, ayag kabĩ alef.”

¹⁸ Jesus age yen nigin, Juda tamo idi ĩ dukesiyouf nigin kabĩ total dalen, Sabat naa nē lo wal fiya bun nigin dogol sã, ĩ Negur nigineg neu Dei ye fen, aya Negur ado tekelei yen nigin.

¹⁹ Anĩ nigin, Jesus od enei idi irokenēdin, “Aya ã momoi bagai arokeneik, Naal ĩ yogon oroyam ereb taka to age fouf, ĩ Tama age fef anĩ dogol ile fen, ĩg age fedig, ere nigin, ereb Tama age fef are Naaleg age fouf. ²⁰ Tama ĩ Naal nigin wau laaf fen, ĩ ereb ereb age fedig anĩ ganan ifelnek. ĩ ereb ereb enei wal fiya Naal ifelnēf, anĩ bun ã terē gouf. ²¹ Tama ĩ laa turĩ feid fen, mata ifenēdidig, age fiya bagai, Naal ĩg aib ĩ orof anĩ

mata ifenēdig. ²² Tama ï aib taka to es fiyēf, anī ere, ï es fiya kabī ganan Naal bun inon, ²³ are tamo kayau ganan idi Temeid yana dalesedig gen, Naal nigineg yana dalesauf nigin ï age fen. Taka ï Naal yana to yalesef, ï Tamam Naal sur fiyen anī yana to yalesef.

²⁴ “Aya ā momoi bagai arokeneik, taka ï neu od karī ye fen, aya sur fiyan ï nigin momoi yef, ï mata faimud ibodkeleya ado fen, es fiya bun to ilauf. ï laa bun tamal ibal fen, mata bun ilen. ²⁵ Aya ā momoi bagai arokeneik, sain fau isif, are mogo yeir isil, laa tamo Negur Naal nē ait karī douf, idi karī def anidi mata dibodōf. ²⁶ Tama ï yogo bun mata ado, age fiya bagai, ï mata de anī Naaleg adouf nigin ifenen. ²⁷ Agef fen, Tama ï Naal es fediyouf nigin megeir ifenen, ere nigin, ï Tamo Naal.

²⁸ “Eig fiya bun to terē gouf, sain fau isif, ganan nedi matmat bun dibodok idi, yogon ait karī de fen, ²⁹ ulolō desiyouf, idi biya age difen anidi mata dibodōf nigin fafā douf, idi sane age difen anidi es fedī di, hel bun dilauf nigin fafā douf. ³⁰ Aya neu oroyam, ereb taka to naig be afouf. Aya karī auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anī ere, aya sur fiyan ï wau al fouf nigin au fen, age afedig.

Jesus Yogo Nigin Kurō Fesin

³¹ “Aya yug nigin aya mugu wogō auf are, neu wogōya are, momoi be sā be anī yaor sā. ³² Taka ï aya nigin kurō fesidig, agef fen, aya keleī, ï aya nigin kurō fesif are momoi.

³³ “Ã Jon garan tamo tunĩ sur wedige di, ã aya nigin momoi od anĩ kurõ falaisi irokenẽdin.

³⁴ Aya tamom aya nigin kurõ fesif anĩ to aroudig, anĩ ere, aya ã isenneĩf au fen, od anĩ wogõ aun.

³⁵ Jon ã lam futur fen, lalan ifenen, age fe di, ã sain tobega bagai waleg fen, in lalan nigin wauĩ al fen.

³⁶ “Neu kurõ fesiya anĩ Jon nẽ wal fiya, ere nigin, kabĩ aya bure afalauf nigin Dei ifanan alef anim, Dei ã aya sur fiyan anĩ kurõ fesif. ³⁷ Dei

ã sur fiyan ã yogo, aya nigin kurõ fesin. ã ã ait to karĩ gen, nog to ulegen, ³⁸ in odeg ã bun to ibodok, ere nigin, ã sur fiyen anĩ ã nigin to momoi gedig. ³⁹ ã Negur nẽ Itotoya keleĩ youf nigin kabĩ

total walegedig, ere nigin, ã kisi gef, anĩ bunem amã mata faimud ibodkeleya malef ge fen, ago gedig. Negur nẽ Itotoya enei, aya nigin kurõ fesif.

⁴⁰ Anĩ ere, ã mata yaleya nigin, aya wageun isiya utorõgedig.

⁴¹ “Aya tamom yanau dalesauf nigin to orok, ⁴² anĩ ere, aya ã nigin keleĩ. Aya keleĩ, ã wauĩ bun Negur nigin wauĩ laa fiya to ibodok. ⁴³ Aya

neu Dei yana bunem asin, anĩ ã aya to waleyagen, anĩ ere, aibem taka yogo yana bunem isif are, ã walogouf. ⁴⁴ ã abob yana yaleseya anĩ oroyei ken, yana yaleseya Negur Tekelei bunem isif anĩ to total unog walogouf are, ã naig ge momoi gouf?

⁴⁵ “Anĩ ere, ã ayam Dei mala bun ãgenei sane anĩ kurõ afesiyouf ge fen to kisig. ãgenei sane kurõ fesiya are Moses, ã bun ãgenei wauĩ iseya unogedig anĩ. ⁴⁶ ã Moses nigin momoi gem are, aya nigineg momoi gem, ere nigin, im aya nigin itoton. ⁴⁷ Anĩ ere, ereb ã itoton anĩ to momoi

gef nigin, naig ge fen, aya wogõ auf enei nigineg momoi gouf?”

6

Jesus Faif Tausen Tamo Saaf Ifenēdin
(*Matyu 14:13-21; Mak 6:30-44; Luk 9:10-17*)

¹ Enei dumen, Jesus Galili Maaĩ ub sitakã ibal ilen (Galili Maaĩ anĩ, yana taka Taiberias Maaĩ).
² Age fe di, tamo kayau musei ã dõ difiyen, ere nigin, ã dagi tamo kayau bun memelik ino di, meledim dilen. ³ Agef fen, Jesus arein isel, yogon dõ fiya tar geid dibodon. ⁴ Juda neid sifa inoya Pasa naa melsã mog.

⁵ Sain Jesus mala irakel, tamo kayau musei ã garan disi mog, ileid fen, ã Filip irokenen, “Ada tamo kayau eneidi dãf nigin, bret nain na talouf?”
⁶ ã Filip kisi fiye ken, enei to fen, ere nigin, Jesus ã ereb age foug nigin are ã kelei.

⁷ Filip Jesus aiten yalen, “Ogõ eit nẽ mala anim, idi mugu mugu nigin bret na talouf are, tunĩ to dõ dilouf.”

⁸ In dõ fiya tamo taka Endru, Simon Pita nẽ tura anĩ Jesus irokenen, ⁹ “Kesu taka yeir baali bret faif gau uru ado, anim musei ganen enei tau kisi falauf?”

¹⁰ Jesus iron, “Tamo kayau urokenēdig len, dibod.” Modoũ anĩ bun fisir musei ado, an tamo dibodadan faif tausen age fiya. ¹¹ Gama Jesus bret anĩ geif, Negur de fiye ken, idi dibodadan neid oroya kilei, anĩ gadõ fedin. ã gau buneg de age fen.

¹² Idi ganan dō kisi fele di, Jesus in dō fiya tar irokenēdin, “Tunī ditoraram anī kurug. To sekil fiyauf.” ¹³ Anī nigin, baali bret faif anī idi dokon, masak tunī ifaredin anī kuru dife di, karam tuwelf isokosedin.

¹⁴ Tamo kayau memelik inon anī dile fen, idi diron, “Momoi bagai, enei are Profet teneub enei bun isiyouf ya anī.” ¹⁵ Idi disi, Jesus king ibodōf nigin nugo difiyēf ya anī, ī kelei ken, baban mugu arein kel iselen.

Jesus Naan Teteatu Iyon
(*Matyu 14:22-33; Mak 6:45-52*)

¹⁶ Gugumek isi di, yogon dō fiya tar daliyoun disilen. ¹⁷ An idi waag taka bun sosō de daliyou dibal fen, Kapenaum luwe dile mog, mogo gugumen, anī Jesus fau idi garan to isin. ¹⁸ Yau total isi di, maaī moloun wī yen. ¹⁹ Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumī tererē den. ²⁰ Anī ere, ī idi irokenēdin, “Are ayam, to kumī wog.” ²¹ Age ye di, ī waag bun dalesnēf nigin waud yenen, kaisā bagai, idi dilauf nē waud iron ub anī bun, waag goro fen.

²² Naa taka di, tamo kayau daliyou ub sitakā difaren idi kelein, waag tekelei dogol an ibodon, anī Jesus in dō fiya tar geid to sō den, idi dogo dogol dilen. ²³ Waag tunī Taiberias temeleid, Odug, bret Negur de fiye ken, tamo kayau ifeneīd don modoū anī non, goro difen. ²⁴ Tamo kayau, Jesus in dō fiya tar geid an to dibodon anī kelei

ken, idi waag sosō de fen, Jesus dimirnēf nigin Kapenaum dilen.

Jesus Mata Nē Bret

²⁵ Sain tamo kayau idi, daliyou sitakā Jesus fotou dife fen, idi ī to difiyen, “Rabi, ere sain ō ein usin?”

²⁶ Jesus aitedin yalen, “Aya ā momoi bagai arokeneik, ā aya umirnagef, ā memelik ulegen nigin sã, anī ere, ā bret ifoutneī di, wōg eweī gere fen nigin. ²⁷ Saaf sane ledig anī nigin to kabī waleg, anī ere, saaf to sane le fen, mata faimud ibodkeleya bun ibodōdig anī nigin kabī waleg, are Tamo Naalem ifeneīf. Ī dogol Tama Negurem igrne ken, yoya nē megeir ganan ifenen.”

²⁸ Age ye di, idi ī to difiyen, “Amā Negur nē kabī malouf nigin, naig bagai mafouf?”

²⁹ Jesus solof iron, “Negur nē kabī are yeir, Negurem sur fiyen ī nigin momoi gouf.”

³⁰ Anī nigin, idi ī to difiyen, “Ere memelik bun uris wanamā di, mail fen, ō momoi mayōf? Ere anī ō unouf? ³¹ Amā nemā tubumā tar gerere tuan mana don, Negur nē Itotoya bun eig ye yenek kilei, Ī idi saa ilun tamal bret dāf nigin ifenēdin.”* ”

³² Jesus idi irokenēdin, “Aya ā momoi bagai arokeneik, Moses im bret saa ilun tamal to ifenein, anī ere, neu Dei ī yogo bret kaū bagai saa ilun tamal ifeneik. ³³ Ere nigin, Negur nē bret saa ilun tamal isi fen, teneub enei mata ifenek.”

* **6:31:** Eksodas 16:4; Nehemaia 9:15; Sam 78:24, 25

³⁴ Idi diron, “Odug, gama ilauf enei bun bret anī wanamã.”

³⁵ Jesus idi irokenēdin, “Aya anī mata nē bret. Taka ī aya bun isif, to bagai naū ilauf, taka ī aya nigin momoi yef, to bagai naan ail fouf. ³⁶ Anī ere, aya ā arokenein kilei, ā mogo uleyagen, anī fau to momoi gef. ³⁷ Idi ganan Deim ifanaf, aya bun disiyouf, taka ī aya bun isif, aya to bagai aruwauf. ³⁸ Aya saa ilun tamal asin, aya neu oroya dō afouf nigin sã, anī ere, aya sur fiyan nē oroya dō afouf nigin. ³⁹ Aya sur fiyan nē oroya are yeir, idi ganan ī ifanan taka to folō afalauf, anī ere, aya idikeleya naa bun alesnēdiyof. ⁴⁰ Neu Dei nē oroya anī, taka ī Naal ile fen, ī nigin momoi yef, mata faimud ibodkeleya yalouf, idikeleya naa bun aya alesnēf.”

⁴¹ Od enei Juda tamo karī de fen, ī nigin nauseir den, ere nigin, Jesus iron, “Aya bret saa ilun tamal asin.” ⁴² Idi diron, “Eī Jesus sã de? Josef naal, in sina tama ado ada keleī. Naig fe di, ī irok, ‘Aya saa ilun tamal asin’?”

⁴³ Jesus solof iron, “Ã aug to nauseir gouf. ⁴⁴ Taka yogon oroyam, aya wageun isiya kisi feleya sã, anī ere, Dei aya sur fiyan inim, ī namen kabī yale fen, aya garan irou isiyouf. Age fe di, idikeleya naa bun, aya ī alesnēf. ⁴⁵ Profet neid itotoya bun eig ye yenek, ‘Idi ganan Negurem ifelnēdiyof.’† Taka ī Dei karī fiye ken, ī bun keleī yalef, aya bun isidig. ⁴⁶ Taka nem Dei to ilen, Negur bunem isin im dogol. Ī yogo dogol Dei ilen. ⁴⁷ Aya ā momoi bagai arokeneik, taka ī momoi

† **6:45:** Asaia 54:13

yef, mata faimud ibodkeleya ado. ⁴⁸ Aya mata nē bret. ⁴⁹ ãGenei tubuĩ tar gerere tuan mana don, anĩ ere, idi gare den. ⁵⁰ Anĩ ere, bret enei saa ilun tamal isif, are tamo yãf, to laa fouf. ⁵¹ Aya mata ibodõya bret, are saa ilun tamalem isin. Taka ã bret enei yoko, ã mata faimud ibodõf. Bret enei aya bouwau, are teneub ganan bun, tamo kayau mata dalouf nigin afenēdiyof.”

⁵² Age ye di, Juda tamo dogo dogol fatuk bagai luwa diroun, “Naig fe fen, tamo enei yogon bouwa ifanada tãf?”

⁵³ Jesus idi irokenēdin, “Aya ã momoi bagai aro-keneik, ã Tamo Naal nē bouwa to wãgauf, in naud to wãgauf are, ã namein mata to ibodok. ⁵⁴ Taka ã neu bouwau yokon, neu naudou yoko, ã mata faimud ibodkeleya ado, anĩ aya fau idikeleya naa bun alesnēf. ⁵⁵ Ere nigin, neu bouwau are saaf bagai, neu naudou are naan bagai. ⁵⁶ Taka ã neu bouwau yokon, neu naudou yoko, ã aya nameun ibodok, aya ã namen abodok. ⁵⁷ Mata ibodõya Dei aya sur fiya di, aya Dei bunem mata abodok gen, taka ã aya yõyaf, aya bunem mata ibodõf. ⁵⁸ Bret enei saa ilun tamal isin. ãGenei tubuĩ tar mana don are gare desin, anĩ ere, taka ã bret enei yoko, faimud mata ibodkalauf.” ⁵⁹ ã od enei Kapenaum taun an, Juda neid uub fõ bun ifelneĩd fen, wogõ yen.

In Dõ Fiya Tar Musei Jesus Ditornen

⁶⁰ Od enei karĩ de fen, in dõ fiya tar musei diron, “Ifelnadaf eĩ totol bagai. Aim anĩ kelei youf?”

⁶¹ In dõ fiya tar od enei nigin nauseir de di, Jesus anĩ kelei ken, idi irokenēdin, “Od enei ã

morõ ifeneik de? ⁶² Ba, Tamo Naal ï ibodon nẽ kel isel mog ulogouf are, ã ere kisi gouf? ⁶³ Awa Uurem mata ifenẽdig, bouwa are gorõ. Od aya wogõ ayein are Uur, od anï mata ifenẽdig. ⁶⁴ Anï ere, ã tunï momoiya sã.” Ere nigin, Jesus idi nigin gariya bun kelein, aiyaim ï nigin to momoi den, aim ï nigin kiwai inouf. ⁶⁵ Ï od tobol fe iron, “Anï nigin, aya od enei arokenein, Dei ï nigin wau to yalouf, ï aya bun isiya kisi feleya sã.”

⁶⁶ Od enei bunem, in dõ fiya tar musei keku den, baban Jesus to dõ difiyen.

⁶⁷ Jesus in dõ fiya tar tuwelf to fedin, “Ãg aya utornag ulagauf de?”

⁶⁸ Simon Pita solof iron, “Odug, amã ai bun malauf? Õ mata faimud ibodkeleya nẽ od ado. ⁶⁹ Amã momoi mau fen, keleï, õ anï Negur nẽ Fateul.”

⁷⁰ Age ye di, Jesus idi irokenẽdin, “Tuwelf ã ayam to agirnein de? Anï ere, ã atun taka are Satan.” ⁷¹ (Ï Judas, Simon Iskariot naal nigin kisif fen, iron. Idi tuwelf anï taka Judas, fau dum Jesus kiwai ifenen.)

7

Jesus Salafat Nẽ Sifa Bun Ilen

¹ Enei dumen, Jesus Galili an iyon, Judia distrik so fiyen, ere nigin, an Juda tamo ï dukesiyouf nigin ololo difen. ² Anï ere, Juda neid Salafat nẽ Sifa naa melsã di, ³ Jesus tura tarem ï dirokenen, “Õ ein utor ken, Judia ulauf, ago di, ogon dõ fiya tar, memelik uno di, dilouf. ⁴ Tamo taka ï, tamo kayau meleid bun mala yaor wõ you fenẽ,

ĩ iminēyan kabĩ to yaledig. Ō eneidi agof, õ ogo tamo kayau ganan ufelnēdiyof.” ⁵ Ĩ yogon tura tar bagaig, ĩ nigin to momoi den.

⁶ Anĩ nigin, Jesus idi irokenēdin, “Aya neu sain bagai fau isiya sã, ã nigin sain ganan kisi feleya bagai. ⁷ Tenebur tamo kayau idi, ã to kiwai difeneik, aya nigin kiwai, ere nigin, ereb sane age difef anĩ kurõ afesidig. ⁸ ã Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.” ⁹ Jesus od enei wogõ yel fen, Galili distrik an ibodon.

¹⁰ Anĩ ere, tura tar Sifa bun diselel mog, ĩg iselen, anĩ ere, mala yaor sã, iminēyan. ¹¹ Sifa bun, Juda tamo idi, ĩ nigin meleid dino fen, to difen, “Tamo are nain?”

¹² Tamo kayau atun, ĩ nigin fatuk bagai kosesē kurã den. Tunĩ diron, “Ĩ tamo biya.”

Tunĩ solo de diron, “Eo, ĩ tamo kayau idegnēdidig.” ¹³ Anĩ ere, taka nem ĩ nigin yaor to kurõ fesin, ere nigin, idi Juda tamo nigin kumĩ den.

Jesus Sifa Bun Ifelnēdin

¹⁴ Sifa mogo atusil ifar mog, Jesus tempel modoũ bun isel fen, od ifelnēdin. ¹⁵ Juda tamo idi terē de fen, diron, “Tamo enei tai fiya yaleya sã mog, naig fe fen, keleĩ eig fiya ado?”

¹⁶ Jesus solof iron, “Neu ifelnēya are neu sã, aya sur fiyan ĩ bunem isif. ¹⁷ Taka ĩ Negur nē oroya dõ fiya nigin orof are, neu ifelnēya Negur bunem isif be, aya neu oroya nem wogõ auf be anĩ, ĩ keleĩ youf. ¹⁸ Taka ĩ yogon kisim wogõ yef are, ĩ yogo yana yaleseya nigin age fef, anĩ ere, taka ĩ sur

fiyen nē yana yaleseya nigin kabī yalef, tamo are momoi nē. Ī bun idegēya taka sã. ¹⁹ Moses lo anī to ifenein de? Anī ere, ã atun, taka nem lo to dō fedig. Ere nigin ã aya unakesigouf nigin ago gef?”

²⁰ Tamo kayau solo de diron, “Ō kaa sane ado. Aim ō inokesiyouf nigin age fef?”

²¹ Jesus idi irokenēdin, “Aya memelik taka ano di, ã ganan terē gen. ²² Anī ere, Mosesem mulū ileyā ifenein nigin, ã kesu Sabat naa bun mulū ileyā wenēgedig (mulū ileyā are, Moses bunem to isin, teneub te bunem isin). ²³ Moses nē lo to wal gouf nigin, Sabat naa bun kesu nē mulū ileyā wenēgedig, ere nigin aya Sabat naa bun, tamo bou adok el afe di, ã aya nigin nameī sanedig? ²⁴ Mala yaor anī dogol uleg fen, to es gei, tutuk bagai el ge, es gei.”

Jesus Anī Kristus De?

²⁵ Sain anī bun, Jerusalem tamo kayau tunī diron, “Tamo enei are idi ĩ dukesiyouf nigin age difef anī sã de? ²⁶ Ī de yeir, mal atun wogō ye di, erēb od taka to dirokenek. Mudur adodo idi, ĩ anī Kristus ya anī mogo tutuk keleī de? ²⁷ Anī ere, tamo enei nain be tamal, are amã keleī. Sain Kristus isiyouf, taka nem ĩ nainenem be isif to keleī youf.”

²⁸ Age de di, Jesus fau tempel modoū bun ifelneīd fen, iweig iron, “Are de, ã aya nigin keleī, aya nainenem asin are ã keleī. Aya ein neu oroyam to asin, anī ere, ĩ aya sur fiyan are momoi. Ā ĩ keleī sã, ²⁹ anī ere, aya ĩ keleī, ere nigin, aya ĩ bun tamal, im aya sur fiyan.”

³⁰ Od enei bun, idi ã dirounêf nigin age difen, anĩ ere, taka nem ã bun ima to inon, ere nigin, yogon sain fau isiya sã. ³¹ Anĩ ere, tamo kayau musei fau ã nigin momoi de fen, diron, “Sain Kristus isiyouf, ã memelik tamo enei inodif anĩ wal fiya inodiyouf de?”

³² Tamo kayau ã nigin age de, kosesê kurã de mog, Farisia tamo idi karĩ den. Age de fen, pris odudug Farisia geid, tempel lo fiya tamo Jesus dalouf nigin sur difedin.

³³ Jesus iron, “Aya ã geid sain modeg tabodok, age afe fen, aya ã aya sur fiyan bun alauf. ³⁴ Æ aya umirnagau, anĩ ere, ã to fotou wiyagau. Aya abodõf nẽ an, ã isiya kisi feleya sã.”

³⁵ Juda tamo abob dirokenen, “Tamo enei nari bagai ile di, anĩ ada ã to fotou tafouf? Ada neda tamo kayau firagagaũ difen, Grik tamo kayau atun dibodok nẽ an, ã ile fen, Grik tamo kayau ifelnẽdiyof de? ³⁶ Ere gariya nigin ã iron, ‘Æ aya umirnagau, anĩ ere, ã to fotou wiyagau. Aya abodõf nẽ an, ã isiya kisi feleya sã?’”

³⁷ Sifa naa odug idikeleya bun, Jesus ifar fen, iweig iron, “Taka ã naan ail fouf, aya bun isi fen, naan yãf. ³⁸ Taka ã aya nigin momoi yef, Negur nẽ Itotoya iron kilei, warur naan ã namenem ulo ulõ yef yenêf.” ³⁹ Æ od enei Awa Uur nigin wogõ yen, are idi Jesus nigin momoi den anidi fau dalouf. Sain anĩ bun, Awa Uur isiya san, ere nigin, Jesus fau fula fiya medeïya yaleya sã.

⁴⁰ Od enei karĩ de fen, tamo kayau tunĩ diron, “Momoi bagai, tamo enei Profet ada tari tafef anĩ.”

⁴¹ Tunĩ diron, “Ĩ Kristus.”

Tunĩg diron, “Kristus ouf are, naig fe fen, Galilim isiyouf? ⁴² Kristus Dawid nē ibor bunem, Betlehem taun Dawid ibodon nē anenem isiyouf, anĩ Negur nē Itotoya to irok de?” ⁴³ Anĩ nigin, tamo kayau Jesus nigin fara furu difen. ⁴⁴ Tunĩ Jesus ka difiyēf nigin age difen, anĩ ere, taka nem ĩ bun ima to inon.

Juda Neid Mudur Adodo Momoiya Sã

⁴⁵ Tempel lo fiya tamo idi, pris odudug Farisia tamo gedin keku de dile di, to difedin, “Ere nigin ã ĩ to urou usigel?”

⁴⁶ Tempel lo fiya tamo solo de diron, “Taka nem, tamo enei wogõ yedig gen to wogõ yedig.”

⁴⁷ Farisia tamo solo de diron, “Ĩ ãg idegnein de?

⁴⁸ Mudur adodo Farisia tamo geid atun, taka ĩ nigin momoi yen de? ⁴⁹ Sã, anĩ ere, tamo kayau eneidi idi lo keleĩ sã, idi Negurem gelu fedif.”

⁵⁰ Nikodemus, idi neid taka, tetunem Jesus garan ilen, ĩ irokenēdin, ⁵¹ “Ada neda lo bun, taka ĩ ereb age fef anĩ ileyã nigin ketem karĩ tafiye ken, es tafedig. Age fiya sã de?”

⁵² Idi solo de diron, “Õg Galili tamal de? Umir ken, fau keleĩ youf, profet taka Galilim to isif.”

[Itotoya tunĩ kulu bagai od gariya dino fen, ditoton anĩ bun, Jon 7:53-8:11 to ibodok.]

⁵³ Age de fen, idi mugu mugu dogo neid fonõ fonõ dilen.

8

¹ Anĩ ere, Jesus Moul Arei bun iselen. ² Bonimei mumurei ado, ĩ baban tempel modoũ bun wõ yen,

an tamo kayau ganan guru de salili difiyē di, ï ifelnēdiyof nigin ibodon. ³ Lo ifelnēdiya tamo Farisia tamo geid idi, kayau taka noli ye mog, dale dirou disi, guru fiya mala bun dinenē di, ifaren. ⁴ Age dife fen, Jesus dirokenen, “Tise, kayau enei noli tobonunã ino di, malel. ⁵ Lo bun, kayau age fediya meein tulu fiya nigin Moses irokanaman. Gama ò ere wof?” ⁶ Idi ï bou bun od yūya nigin kor dino fen, age de, to difiyen.

Anĩ ere, Jesus obũ yeis fen, ima gegem teneub bun itoton. ⁷ Idi ï to difiyētū di, ï fã ye, saules fen, irokenēdin, “Ã atun, aib taka ï mosor sãf, ï ketem kayau bun meein irãf.” ⁸ Baban ï obũ yeis fen, teneub bun itoton.

⁹ Idi od anĩ karĩ de fen, idi mugu mugu ul de, diyalelen, biyedim uyu dirou di, age de dile, Jesus kayau ifaren anĩ ado dogol ditornēdin. ¹⁰ Jesus saules fen, kayau to fiyen, “Kayau, idi nai difef? Idi takam baban ò bun od to yuk de?”

¹¹ Kayau iron, “Odug, takam to age fef.”

Jesus iron, “Ayag ò boũ bun od to auk. Ule fen, sain enei ilauf ganan, mosor baban to uno.”

Jesus Nē Wogōya Are Momoi

¹² Jesus baban tamo kayau irokeneĩd fen, ï iron, “Aya tenebur enei nē fula fiya. Taka ï aya dō fiyauf, ï gugum namen to bagai iyōf, anĩ ere, ï mata nē fula fiya adouf.”

¹³ Age ye di, Farisia tamo idi Jesus dirokenen, “Õ ogo nigin wogō wof, anĩ nigin, ogon wogōya are, momoi be sã be anĩ yaor sã.”

¹⁴ Jesus solof irokenēdin, “Aya yug nigin wogō auf, anĩ ere, neu wogōya are momoi, ere nigin,

aya nainenem asin, nain be alauf anĩ, aya keleĩ. Anĩ ere, ã, aya nainenem asin, nain be alauf anĩ, keleĩ sã. ¹⁵ ã tamo nẽ tobonunã bunem es gedig, aya aib taka to es afedig. ¹⁶ Anĩ ere, aya es afouf are, neu es fiya are tutuk, ere nigin, aya mugu sã. Aya Dei inim sur fiyan ado mafaref. ¹⁷ ãgenei Lo bun itotoya irok, tamo urom wogõ tekelei dinof, are momoi. ¹⁸ Aya yug nigin kurõ afalaisidig, age afe di, Dei aya sur fiyan ã, aya nigin kurõ fesidig.”

¹⁹ Age ye di, idi Jesus dirokenen, “Õ tamã nain?”

Jesus solof iron, “Ã aya nigin ado neu Dei nigineg keleĩ sã. ã aya nigin keleim are, neu Dei nigineg keleim.” ²⁰ ã tempel bun kolekta inoya nẽ modoũ non ifelneĩd fen, od enei wogõ fiyẽdin. Anĩ ere, takam ã to ima ka fen, ere nigin, in sain fau isiya sã.

²¹ Jesus baban idi irokenẽdin, “Aya atorneĩ di, ã umirnagauf, agog fen, ã ãgenei mosor bun gare gouf. Aya elef nẽ an, ã isiya kisi feleya sã.”

²² Anĩ bunem, Juda tamo idi diron, “ã yogo bouwa yukesiyouf de? Anĩ nigin, ã, ‘Aya elef nẽ an, ã isiya kisi feleya sã,’ yef de?”

²³ Anĩ ere, Jesus tobol fe fen, irokenẽdin, “ã tenebur temelei, aya ilun temelou. ã teneub enei nẽ, aya teneub enei nẽ sã. ²⁴ Anĩ nigin, aya, ã ãgenei mosor bun gare gouf ayein. Aya yug nigin, aya im audig anĩ, to momoi gouf are, ã momoi bagai ãgenei mosor bun gare gouf.”

²⁵ Age ye di, idi ã to difiyen, “Õ ai?”

Jesus idi irokenēdin, “Aya aib anī, mogo gariya bunem arokeneik asin. ²⁶ Aya ã nigin wogōya musei ado, es fiya nigineg musei. Anī ere, sur fiyan ī, momoi bagai, anī nigin, ereb aya ī bun karī aun anī, tamo kayau tenebur ein arokenēdif.”

²⁷ Idi, ī Tama nigin irokenēdif ya anī, to kisi fokō yen. ²⁸ Anī nigin, Jesus iron, “Sain ã Tamo Naal walesagauf bun, aya yug nigin aya im audig anī, ã keleī youf, aya neu oroyam ereb taka to age afedig, anī ere, aya Dei ifelnan anī dogol wogō audig anī, ã keleī youf. ²⁹ Aya sur fiyan ī, amã urom mabodok, ī mugu to itornal, ere nigin, aya faimud, ereb ī wau al foug anī, age afedig.” ³⁰ Age wogō ye di, musei ī nigin momoi den.

Abraham Gere Tar

³¹ Jesus, Juda tamo ī momoi difiyen anidi irokenēdin, “Aya afelnein anī uroug tokō walagauf are, ã momoi bagai neu dō fiya tar. ³² Agog fen, ã momoi anī keleī youf, momoi anim kafī fiya bun tamal yalelneif.”

³³ Idi aiten dale dirokenen, “Amã Abraham nē ibor nē tubu tar, amã aib taka nē ferfer to mabodon. Ere wo fen, amã kafī fiya bun tamal yalelnamāya nigin urok?”

³⁴ Jesus aitedin yale iron, “Aya ã momoi bagai arokeneik, taka ī mosor inof are, ī mosor nē ferfer. ³⁵ Ferfer ī, ibor anī bun gai ibodkeleya modoū sã, anī ere, modoū are naal nē faimud ibodkalauf. ³⁶ Anī nigin, Naal ī kafī fiya bun tamal yalelneif are, ã momoi bagai karika lauf. ³⁷ Æ Abraham nē ibor nē tubu tar are, aya keleī. Anī ere, ã aya unakesigouf nigin dodok gef, ere nigin,

ã neu od nẽ modoũ namein to ibodok. ³⁸ Ereb aya Dei mala bun ailen anĩ, aya ã arokeneik, ãg ereb ãgenei temeĩ bun karĩ gen anĩ ago gedig.”

³⁹ Idi aiten dale dirokenen, “Abraham ã tamamã.”

Age de di, Jesus iron, “Ã Abraham gere tarem are, Abraham age fedin anĩ ago gem. ⁴⁰ Gama ã, aya Negur bun momoi anĩ karĩ au fen, arokenein anĩ, unakesigouf nigin naab umirẽgef. Abraham ã to age fen. ⁴¹ Ã temeĩ age fedig anĩ ago gef.”

Age ye di, idi Jesus dirokenen, “Amã seseirã inoya naab bun temelamã sã. Nemã Tamamã are Negur yogo dogol.”

Satan Gere Tar

⁴² Jesus idi irokenẽdin, “Negur ã Temeim are, ã aya nigin wauĩ laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan. ⁴³ Ere nigin neu od nigin wauĩ to fokõ yef? Are aya wogõ auf anĩ, ã kariya kisi feleya sã nigin. ⁴⁴ Ã, temeĩ Satan nẽ, anĩ nigin, ã temeĩ nẽ oroya dõ fiya nigin oroyeik. Ì gariya bunem isin, ã yukesiya kaa, momoi to iroudig, ere nigin, ã namen momoi sã. Ereb sain ã idegẽya od wogõ yedig, ã yogon od bagai wogõ yedig, ere nigin, ã kori tamal, idegẽya tama. ⁴⁵ Anĩ ere, aya momoi anĩ wogõ audig nigin, ã to momoi wiyagedig! ⁴⁶ Ã takam, aya neu mosor anĩ tau kurõ fesiya kisi feleya? Aya momoi wogõ auf are, ere nigin ã to momoi wiyagef? ⁴⁷ Aib ã Negur nẽ, ã Negur ereb yef anĩ karĩ yedig. ã to karĩ gef anĩ nẽ gariya are, ã Negur nẽ sã nigin.”

Jesus Yogo Nigin Iron

⁴⁸ Juda tamo aiten dale dirokenen, “Amã õ Samaria tamal, kaa sanem irounon mauf are, momoi to morok de?”

⁴⁹ Jesus solof iron, “Aya kaam to irounan, anĩ ere, aya neu Dei yana seli abidig, ã aya selu to wabigedig. ⁵⁰ Aya yug nigin fula fiya medeĩa to amirek, anĩ ere, taka ĩ anĩ imirek are ibodok, ĩ anĩ es fiya tamo. ⁵¹ Aya ã momoi bagai arokeneik, taka ĩ neu od irou kafĩ falauf are, ĩ laa to bagai gurug fouf.”

⁵² Juda tamo, anĩ bun Jesus dirokenen, “Gama amã keleĩ, õ kaa sanem irounon! Abraham laa fen, profeteg gare den, anĩ ere, õ, taka ĩ ogon od irou kafĩ falauf are, ĩ laa to bagai kobũf ilouf, wof. ⁵³ Õ tamamã Abraham wal fiya de? ĩ laa fen, profeteg age difen. Õ kisi wof, õ ai?”

⁵⁴ Jesus aitedin yale iron, “Aya yug selu alesauf are, neu seli alef are ege. Neu Dei, ĩ anĩ ãgenei Negur gef, ĩ aya yanau yalesedig. ⁵⁵ ã ĩ keleĩ sã, anĩ ere, aya ĩ keleĩ. Aya ĩ keleĩ sã auf are, aya ã gen idegẽya tamouf, anĩ ere, aya ĩ keleĩ bagai, in od dõ afedig. ⁵⁶ Temeĩ Abraham ĩ, neu naa anĩ ilouf nigin kisif fen, wau al fen. ĩ anĩ mogo ile fen, kulĩ yen.”

⁵⁷ Anĩ nigin, Juda tamo Jesus dirokenen, “Õ fau yar fifti yaleya sã, anĩ õ mogo Abraham ulen de?”

⁵⁸ Jesus idi irokenẽdin, “Aya ã momoi bagai arokeneik, Abraham gõ fiya sã mog, aya abodon.”

⁵⁹ Anĩ nigin, idi ĩ meein tulu difouf nigin meein gei difen, anĩ ere, Jesus bouwa inokel fen, tempel modoũ bun tamal iya ilen.

9

Jesus Tamo Taka Mala Ifofakeleya Gõ Difiyen Anĩ El Fiyen

¹ Jesus iyok ile fen, tamo taka mala ifofakeleya gõ difen anĩ ilen. ² In dõ fiya tar Jesus to difiyen, “Rabi, aim mosor ino di, ã mala ifofakeleya gõ difen, tamo enei yogo de, sina tamam de?”

³ Jesus aitedin yale iron, “Tamo eneimeg sã, sina tama adomeg sã, anĩ ere, Negur nẽ kabĩ ã bunem yaorouf nigin eig fiya wõ yen. ⁴ Eĩ fau gaa ado, aya sur fiyan in kabĩ talouf bagai. Bõ fau isif, sain anĩ, taka nem kabĩ yaleya kisi feleya sã. ⁵ Sain aya tenebur abodok, aya teneub enei nẽ fula fiya.”

⁶ Age wogõ yel fen, ã tenebur isis fen, salina buru ado falei fe fen, tamo mala bun inon. ⁷ Jesus ã irokenen, “Ule, Siloam naan kukor ugũ” (Siloam nẽ gariya, are ‘Sur fiyen’). Anĩ nigin, tamo ile, naan igun, agef fen, mala kelẽ yel, fõ bun isin.

⁸ In fõ tura tar ado, idi ã nonĩ ye mog diledig anidi diron, “Tamo de eneim ibod ken, nonĩ yedig anĩ sã de?” ⁹ Idi tunĩ diron, “Im.”

Tunĩ diron, “Im sã, taka ã genem.”

Anĩ ere, ã yogo iron, “Aya de tamo anim.”

¹⁰ Idi ã dirokenen, “Naig fe di, õ malã kelẽ yeledin?”

¹¹ ã aitedin yale iron, “Tamo yana Jesus dedig im, buru falei fe fen, malau uru bun inodin. ã, aya ele, Siloam naan agũf nigin irokanan. Anĩ aya ele, naan agun, age afe fen, aya malau kelẽ aun.”

¹² Idi ã to difiyen, “Tamo are nain?”

ã iron, “Aya keleĩ sã.”

Farisia Tamo Idi Mala El Fiyen Nē Gariya Dimiren

¹³ Idi tamo mala ifofakelen anī, Farisia tamo gedin dale dirou disin. ¹⁴ Jesus buru falei fe fen, tamo mala el fedin nē naa are Sabat naa. ¹⁵ Anī nigin, Farisia tamo idig, ī naig fe fen, mala kelē yedin anī to difiyen. Tamo are irokenēdin, “Ī malau buru inodin, age fe di, agun, anī aya gama kelē auf.”

¹⁶ Farisia tamo tunī diron, “Tamo enei Negur bun tamal sā, ere nigin, ī Sabat naa to dō fef.”

Anī ere, tunī diron, “Naig fe di, mosor tamo memelik age fediya inoya kisi feleya?” Anī nigin, idi fara difen.

¹⁷ Idi baban tamo mala ifofakelen anī diroke-nen, “Ī ō malā el fen anī, ō ī nigin ere wof?”

Age de di, ī iron, “Ī profet.”

¹⁸ Juda tamo idi, tamo mala ifofakeleya mala kelē yelen anī, fau to momoi den. Anī nigin, idi tamo anī sina tama diweignēdin. ¹⁹ Idi to difen, “Eī ā naaluī de? De ī anī mala ifofakeleya gō mafen gef? Naig fe di, ī gama sā mala kelē yelef?”

²⁰ Sina tama diron, “Amā keleī, ī nemā kesu, anī ī mala ifofakeleya gō mafen. ²¹ Anī ere, ī naig fe fen, gama sā lo fef, aim ī mala el fedin anī, amā keleī sā. Yogo to wiyēg, ī biya, yogo nigin wogō youf.” ²² Sina tama idi, Juda tamo kumī difiyeid fen, age de diron, ere nigin, Juda tamo idi mogo od difon, aib taka Jesus anī Kristus youf are, Juda neid uub fō bun dalelnēf. ²³ Age fiya nigin, sina tama eig de diron, “Ī biya, yogo to wiyēg.”

²⁴ Baban Juda tamo idi, mala ifofakelen anī diweigne ken, diron, “Negur yana wales fen,

momoi nē od dogol urōf, amā keleī, tamo are mosor tamal.”

²⁵ Ī solof iron, “Ī mosor ado be sã be, aya keleī sã. Tekelei aya keleī are, aya malau ifofakelen, anī ere, gama lo afedig.”

²⁶ Age ye di, idi ĩ to difiyen, “Ī ò ere naig yon? Naig fe di, ò malã birikã fedin?”

²⁷ Ī aitedin yale iron, “Aya ã mogo arokenein, anī ere, ã to karī gen. Ere nigin ã baban karī gou fenē? Āg in dō fiya tar wowã gou fenē de?”

²⁸ Age ye di, idi kono difiye ken, diron, “Ō tamo enei nē dō fiya taka! Amã are Moses nē dō fiya tar! ²⁹ Negur Moses wogō fiyen are amã keleī, anī ere, tamo enei nigin, ĩ nainenem isin areg, amã keleī sã.”

³⁰ Tamo anī aitedin yale irokenēdin, “Ago ge di, terē auf. Ī nainenem isin, ã keleī sã, anī ere, aya malau birikaũ fedin. ³¹ Amã keleī, Negur ĩ mosor dinodidig anī to karī fiyēdidig, anī ere, taka ĩ Negur anini fiye ken, Negur nē oroya dō fef are, Negurem ĩ karī fiyēdig. ³² Gariya bunem isi gama, taka nem, tamo mala ifofakeleya gō difen anī birikã fedin yeya to karī yedig. ³³ Tamo enei Negur bun tamal sam are, ĩ ereb taka to naig fem.”

³⁴ Age ye di, idi diron, “Ō mosor barikã gō diyon, naig fe di, ò amã ufelnamak?” Age de fen, idi ĩ mayarē diru dirã di, isin.

Uur Bun Mala Ifofakeleya

³⁵ Jesus, idi tamo anī serē diran yeya anī karī yen. Jesus ĩ fotou fiye ken, iron, “Ō Tamo Naal nigin momoi wof de?”

³⁶ Tamo to fen, “Odug, ai anī ī? Urokana di, aya ī nigin momoi auf.”

³⁷ Jesus iron, “Ō gama ī ulel, de ī anī urom wogō gef.”

³⁸ Age ye di, tamo iron, “Odug, aya momoi auf.” Agef fen, ī Jesus seli yabin.

³⁹ Jesus iron, “Es fiya nigin aya tenebur ein asin, are mala ifofakeleya meleid kelē youf, age fe di, idi meleid kelē yef, are meleid ifofakalauf nigin.”

⁴⁰ Farisia tamo tunī Jesus geid difaren anī, agef wogō ye di, karī de fen, to difen, “Ere? Amāg malamā ifofakeleya de?”

⁴¹ Jesus iron, “Ā momoi bagai meleī ifofakeleyam are, ā mosor sam, anī ere, gama ā malamā kelē yef gef, anī nigin, āgenei mosor fau ibodok.

10

Sipsip Lo Fiya Tamo Yogon Sipsip Geid

¹ “Aya momoi bagai arokeneik, tamo taka ī, sipsip nē kauwor bobog bunem to ilauf, anī ere, naab taka bunem gar ye isilauf are, ī bē tamo, bē yaledig. ² Tamo ī bobog bunem ilef are, ī yogo sipsip marau. ³ Lo fedig tamo ī bobog kāf kenēdidig, age fe di, sipsip ī ait karī dedig. Ī yogon sipsip yana yaleid fen, mayarē guri feid, irouledig. ⁴ Sain ī yogon ganan mayarē guri feid iroule fen, ī ketem uyu iledig, age fe di, yogon sipsip dō difedig, ere nigin, idi yogon ait keleī. ⁵ Anī ere, idi tamo urug to dō difedig, idi ī mā diyawauf, ere nigin, ī ait urug nigin idi keleī sā.” ⁶ Jesus yaab od enei nem wogō fiyēdin, anī ere, ī idi ereb gariya nigin irokenēdin anī, idi to kelein.

⁷ Anĩ nigin, Jesus baban iron, “Aya ã momoi bagai arokeneik, aya sipsip neid bobog. ⁸ Ganan uyulil disin are, idi bẽ tamo, bẽ daledig, anĩ ere, sipsip idi to karĩ difiyēdin. ⁹ Bobog are aya, taka ĩ aya bunem isiyouf are, mata kel yalouf. ĩ namen isi fen, ulō yeis ilauf, agef fen, fisir yōya nē fotou fouf. ¹⁰ Bẽ tamo are bẽ nigin, yukesiyouf nigin ado, narĩ fouf nigin dogol isif, aya idi mata dale fen, barikāuf nigin asin.

¹¹ “Aya sipsip lo fiya tamo biya, sipsip lo fiya tamo biya, yogon mata sipsip nigin itorōdig. ¹² Oroi tamo are ĩ sipsip marau sã. Anĩ nigin, ĩ gaũ kuĩ isi di, ile fen, sipsip itorarã iyadig. Age fe di, gaũ kuĩ sipsip kaka feid fen, firagagaũ fedidig. ¹³ Tamo are iyadig, ere nigin, ĩ oroi tamo, sipsip nigin to karĩ yedig.

¹⁴ “Aya sipsip lo fiya tamo biya, aya neu sipsip keleĩ, neu sipsip idi aya keleĩ, ¹⁵ are Dei ĩ aya keleĩ, aya Dei keleĩ gen. Anĩ nigin, aya neu mata sipsip nigin atorok. ¹⁶ Aya sipsip tunĩ ado, are sipsip kau enei bun temeleid sã, aya idig de guri afeid, arou asiyouf. Idig aitou karĩ douf, age fe di, idi uũ tekelei, sipsip lo fiya tamo tekelei youf. ¹⁷ Neu Dei, aya nigin wau laa fef nē gariya are, aya neu mata baban kel yalouf nigin anĩ atorok. ¹⁸ Taka nem neu mata to son fiyauf, anĩ ere, aya neu oroyam neu mata atorok. Aya neu mata itorōya nigin megeir ado, kel yaleya nigineg megeir ado. Od enei neu Dei bun tamal alen.”

¹⁹ Juda tamo od enei nigin baban fara difen. ²⁰ Musei idi diron, “Ī kaa sane ado, agef fen, wadak. Ere nigin ĩ karĩ wiyēgef?”

21 Anĩ ere, tunĩ diron, “Wogõya enei are, tamo kaa sane ado nẽ sã. Kaa sane ĩ mala ifofakeleya birikã feleya kisi feleya de?”

Juda Tamo Idi To Momoi Den

22 Sain anĩ bun, Negur bun Kel Inoya nẽ Sifa naa Jerusalem wõ yen. Are saneya sain. 23 Anĩ Jesus tempel modoũ bun, Solomon nẽ Waranda dõ fef iyon. 24 Juda tamo guru de, Jesus salili difiye ken, dirokenen, “Sain ganĩ amã lo wamã di, nene mauf? Õ Kristus ouf are, amã el wo, faded wamãf.”

25 Jesus aitedin yale irokenẽdin, “Aya mogo arokenein, anĩ ere, ã to momoi gef. Memelik neu Dei yana nem anodif, are aya nigin irok. 26 Anĩ ere, ã to momoi gef, ere nigin, ã neu sipsip sã. 27 Neu sipsip aya aitou karĩ dedig, aya idi keleĩ, anĩ nigin, idi aya dõ difiyadig. 28 Aya idi mata faimud ibodkeleya afenẽdidig, age afe di, idi to bagai inanakalauf. Takam idi imaun tamal to sosoin fiyauf. 29 Neu Dei idi aya ifanan ĩ, ererb ererb ganan wal fiya. Takam idi neu Dei ima bun tamal son fiya kisi feleya sã. 30 Aya Dei ado tekelei.”

31 Juda tamo baban ĩ meein tulu difiyẽf nigin, meein gei difen. 32 Anĩ ere, Jesus idi irokenẽdin, “Aya Dei bun tamal, ã memelik odudug musei afelnein. Anidi atun nanĩ anĩ nigin, ã aya meein tulu wiyagau fenẽ?”

33 Juda tamo aiten dale diron, “Amã anidi taka nigin meein to tulu mayõf, anĩ ere, Negur kono fiya nigin, ere nigin, õ tamo maug anĩ, ‘aya Negur’ wof.”

³⁴ Jesus idi aitedin yale irokenēdin, “Ãginei Lo bun itotoya anĩ to ibodok de, ‘Aya aron, ã waitou’*? ³⁵ Negur nē od idi bun isin are, Negur idi anĩ waitou yen. Negur nē Itotoya are narĩ fiya kisi feleya sã. ³⁶ Age yen ouf are, Dei yogon bagai igirna fen, ein tenebur sur fiyan anĩ, aya Negur Naal aul anĩ, ere nigin aya kono afel wiyagef? ³⁷ Aya ereb neu Dei age fedig anĩ, to age afef are, aya to momoi wiyagauf. ³⁸ Anĩ ere, aya age afe di, ã neu od to momoi goufeg, memelik anodif anĩ momoi gouf, anĩ bunem Dei aya bun ibodok, aya Dei bun abodok ya anĩ, ã karĩg fen, keleĩ youf.” ³⁹ Idi baban Jesus ka difiyēf nigin age difen, anĩ ere, ĩ oreis yawon.

⁴⁰ Agef fen, Jesus ĩ, Jordan naan sitakã, uruwa bun Jon naan igunēdin modoũ bun, kel ile, an ibodõ di, ⁴¹ tamo kayau musei ĩ garan disidiron, “Jon memelik taka to inon, anĩ ere, Jon tamo enei nigin wogõ yen ganan, are momoi.” ⁴² Age de fen, an musei idi Jesus nigin momoi den.

11

Lasarus Laa Fen

¹ Gama tamo Lasarus dedig dagin. ĩ Betani tamal, Maria ĩ tura Marta ado neid fonõ. ² Maria de anim, kulu moul sumeĩ biya ado, Jesus bun fi fel fen, fatiyam Jesus ye waĩ fen. ĩ main Lasarus gama dagi yenek. ³ Anĩ nigin, main tar Jesus garan od sur difen, “Odug, ĩ nigin waũ laa fedig are dagi.”

* **10:34:** Sam 82:6: Negur ĩ od enei Juda nē es fiya tamo ifenēdin.

⁴ Jesus ï enei karĩ ye fen, iron, “Dagi eneim to laa ilauf, are Negur nẽ fula fiya medeĩya nigin, anĩ bunem, Negur Naal yana dalesauf.” ⁵ Marta, tura ado, maineid Lasarus nigin, Jesus wau laa fen. ⁶ Anĩ ere, Jesus ï Lasarus dagi yenek ya karĩ ye fen, ï ibodon nẽ an baban naa uru ibodon.

⁷ Anĩ bure fele di, Jesus in dõ fiya tar irokenēdin, “Ada Judia distrik baban keku tagauf.”

⁸ Anĩ ere, idi diron, “Rabi, õ gama bagai Juda tamo meein tulu diyõf nigin age difen, anĩ õ an kel ulau fenē de?”

⁹ Jesus irokenēdin, “Gaa tekelei bun aua tuwelf to ado de? Anĩ ege aa luwan to ilalauf. Tamo ï gaa ado iyok, ï ye to tũ fedig, ere nigin, ï teneub enei nẽ lalan anim lo fedig. ¹⁰ Sain ï bõ iyõf are, ye tũ foug, ere nigin, ï lalan sã.”

¹¹ Enei irokkel fen, Jesus idi irokenēdin, “Neda mou Lasarus ï mulã yenek, anĩ ere, aya turĩ afiyēf nigin an elef.”

¹² In dõ fiya tar Jesus solo de dirokenen, “Odug, ï yenek are, ï fau karikauf.” ¹³ Lasarus laa fen nigin Jesus iron, anĩ ere, in dõ fiya tar kisi difen, ï mulã yenēya maug bagai nigin irok den.

¹⁴ Anĩ nigin, Jesus idi faded feid, irokenēdin, “Lasarus laa fen. ¹⁵ ã nigin au fen, aya an to abodon anĩ nigin, aya wau al fef, ere nigin, anĩ bunem ã momoi gouf. Anĩ ere, ada ï gein talauf.”

¹⁶ Anĩ nigin, Tomas Didimus dedig, dõ fiya tar tunĩ ganan irokenēdin, “Weim gare tauf nigin, adag talauf.”

Jesus Lasarus Main Tar Waud Wã Fen

¹⁷ Sain Jesus ile wõ yen are, Lasarus mogo matmat bun naa fo ilelen anĩ karĩ yen. ¹⁸ Betani are Jerusalem melsã, tri kilomita age fiya. ¹⁹ Juda tamo kayau musei, Marta Maria ado maineid laa fen anĩ, waud yo difouf nigin idi gedin disin. ²⁰ Marta Jesus isif ya karĩ ye fen, Jesus fotou fouf nigin ilen, anĩ ere, Maria ã fõ bun ibodon.

²¹ Marta Jesus irokenen, “Odug, õ ein udobom are, mainou to laa fem. ²² Anĩ ere, aya keleĩ, gamag õ ereb taka nigin Negur urokenëf are, ifonõf.”

²³ Jesus Marta irokenen, “Në main baban kel fã youf.”

²⁴ Marta Jesus aiten yale iron, “Aya keleĩ, idikeleya naa kel fãya sain bun, ã baban kel fã youf.”

²⁵ Jesus ã irokenen, “Aya dogol kel fãya në ado mata në. Taka ã aya nigin momoi yef are, ã mata ibodõf, laa foufeg, ã mata ibodõf. ²⁶ Taka ã mata ibod ken, aya nigin momoi yef are, ã to bagai laa fouf. Õ enei momoi wof de?”

²⁷ Marta Jesus irokenen, “Momoi, Odug, aya momoi auf, õ Kristus, Negur Naal, teneub enei bun usin.”

²⁸ ã agef irokel fen, ã kel ile, tura Maria iweigne ken, mugun irokenen. ã iron, “Tise yeir, ã iweignok.” ²⁹ Maria od enei karĩ ye fen, ã kaisã bagai fã yale, Jesus garan ilen. ³⁰ Jesus fonõ wõya sã, ã fau Marta fotou fiyen modoũ anĩ bun ibodon. ³¹ Juda tamo kayau, Maria geid, fõ bun dibod ken, ã wau wã difenen, ã kaisã bagai fã yale, ulõ yeis ile di, dile fen, ã matmat bun inã yalouf nigin ilef de fen, dõ difiyen.

³² Sain Maria Jesus ibodon nê modoũ anĩ bun wõ ye, Jesus ile fen, ã ye gariyan kubũ ye fen, iron, “Odug, õ ein ubodom are, mainou to laa fem.”

³³ Sain Maria inã yalen ado, Juda tamo kayau Maria geid disin idig inã dalen, Jesus anĩ ile fen, wau fatuk bagai gudũf morõ fen. ³⁴ Jesus to fen, “Ĩ nain mũ gen?”

Idi diron, “Odug, usi fen, ule.”

³⁵ Jesus ĩ inã yalen.

³⁶ Age fe di, Juda tamo kayau diron, “Ulegef, ĩ nigin fatuk bagai wau laa fen anĩ!”

³⁷ Anĩ ere, idi tunĩ diron, “Ĩ tamo mala ifofakeleya birikã fedin, tamo eneig laa bun ileya nigin katĩ feleya to kisi feleyan de?”

Jesus Lasarus Laa Bun Tamal Turĩ Fen

³⁸ Jesus baban wau fatuk bagai gudũf fen, matmat bun isin. Matmat are ku, meein nem bobog katĩ difelen. ³⁹ Jesus iron, “Meein waleleg.”

Marta, laa tamo nê main iron, “Anĩ ere, Odug, are gama waai sane, ere nigin, ĩ an naa fo ibodon.”

⁴⁰ Age ye di, Jesus iron, “Õ momoi wof are, Negur nê fula fiya medeĩya ulouf, to age ayon de?”

⁴¹ Anĩ nigin, idi meein are dalelen. Age dife di, Jesus itad fen, iron, “Dei, õ aya karĩ wiyal nigin, õ de ayok. ⁴² Aya kelein, õ faimud aya karĩ wiyadig, anĩ ere, aya tamo kayau yeir difaref nigin od enei orom, are idi onom aya sur wiyān anĩ momoi douf nigin.”

⁴³ Jesus od enei wogõ yel fen, ait odug nem iwegin, “Lasarus, ulõ weis!” ⁴⁴ Laa tamo, ye, ima

gabar masak nem filu difen ado, nawa gabarem sile difen ulõ yesi di,

Jesus idi irokenēdin, “Gabar waleleg fen, utornēge di, ile.”

Jesus Dukesiyouf Nigin Od Difon

(Matyu 26:1-5; Mak 14:1, 2; Luk 22:1, 2)

⁴⁵ Anĩ nigin, Juda tamo kayau musei Maria gein disin, Jesus ereb age fen anĩ dile fen, ĩ nigin momoi den. ⁴⁶ Anĩ ere, idi tunĩ Farisia tamo gedin dile fen, Jesus ereb age fen anĩ dirokenēdin. ⁴⁷ Anĩ nigin, pris odudug Farisia tamo geid, katõ difouf nigin Juda uyu irouya neid kaunsel guru fiya diwegin.

Idi diron, “Ada naig tafouf? Ere nigin, tamo enei memelik musei inodif. ⁴⁸ Ada lo tafe di, ĩ enei eig fef ilauf are, tamo ganan ĩ nigin momoi douf, age dife di, neda ibodõya ado teneub, Rom tamom disi dalouf.”

⁴⁹ Age de di, idi atun taka, yana Kaiafas, ĩ yar anĩ bun pris neid mudur ibod ken, wogõ yen, “Ã ereb taka keleĩ sã! ⁵⁰ Tamo kayau ganan inanakalauf ban, tamo tekeleim tamo kayau nigin laa fouf, are ã nigin deuf anĩ, ã to kisi gef.”

⁵¹ ĩ yogon kisi bunem od enei to iron, anĩ ere, ĩ yar anĩ bun pris neid mudur ibodon nigin, profet od wogõ yen, Jesus Juda tamo kayau ganan nigin laa fouf yen. ⁵² Are Juda tamo kayau nigin dogol sã, Negur gere tar firagagaũ difen anidig, guri feid irusi kuru fedu di, idi tekelei youf nigin, Jesus laa fouf yen. ⁵³ Anĩ nigin, naa anĩ bunem ilen, idi Jesus dukesiyouf nigin naab dimiren.

⁵⁴ Age dife di, Jesus ĩ, Juda tamo kayau meleid bun mala yaor to iyon, ĩ an iminkele fen, teneub akor taka, gerere tuan melsã, fonõ yana Efraim ilen, an yogon dõ fiya tar geid dibodon.

⁵⁵ Sain anĩ Juda neid Pasa naa melsã, musei fonõ fonõ temeleid, dogo neid nonorou lilik fiya nigin, Pasa naa wõya sã mog, Jerusalem diselen.

⁵⁶ Idi Jesus nigin meleid dinof diyon. Idi tempel modoũ bun difar fen, abob to difen, “Ã ere kisi gef? ĩ Sifa bun to isiyouf de?” ⁵⁷ Anĩ ere, pris odudug Farisia tamo geid, taka nem Jesus nain be ibodok ya anĩ ile fen, irokenēdi di, dirounēf nigin wedereid diroun.

12

Betani Oun Jesus Ye Bun Maria Moul Fi Felen (Matyu 26:6-13; Mak 14:3-9)

¹ Pasa nē naa wõya nigin, naa sigis fau ibod mog, Jesus Betani wõ yen, an Lasarus ibodon, ĩ Jesusem laa bun tamal turĩ fiyen. ² An Jesus nigin waud el fe fen, bõ saaf dabin, anĩ Marta aruna yalen. Idi Jesus geid tebol bun dibodon atun, Lasarus ibodon. ³ Age de mog, Maria moul sumeĩ biya, hap lita nad nem dinon, are moni odug nē anĩ yale fen, Jesus ye bun fi fel fen, fatiyam ye waĩ fen. Age fe di, moul sumeĩ biyam, fõ anĩ ino yalen.

⁴ Anĩ ere, Judas Iskariot, in dõ fiya taka, fau dum im Jesus kiwai imeid bun inouf, im iron, ⁵ “Ere nigin moul sumeĩ biya enei, na nigin sur fe fen, moni anĩ maleg tamo to ifenēdiyam? Are yar tekelei bun, kabĩ tamo nē mala yaledig kilei.” ⁶ ĩ maleg tamo nigin kisif fen, enei to iron, ĩ yogo bē

tamo nigin age yen. Ī moni nē kodol lo fiya tamo, moni nē kodol bun dinodig are bē yaledig.

⁷ Anī nigin, Jesus iron, “Kayau are utornēg, ĩ aya mū difiyauf naa nē nigin, moul sumeī biya enei irouwauf. ⁸ Maleg idi, ā geid sain faimud ubodōgouf, anī ere, aya, ā geid sain faimud to tabodōf.”

⁹ Age de mog, Juda tamo kayau musei, Jesus an ibodok ya kelei ken, disin, are ĩ nigin dogol sã, Lasarus Jesusem laa bun tamal turī fiyen ĩg dilouf nigin. ¹⁰ Anī nigin, pris odudug Lasarus ĩg dukesiyouf nigin naab ðimiren, ¹¹ ere nigin, Lasarus bunem, Juda tamo kayau musei Jesus garan dile fen, ĩ nigin momoi den.

*Jesus Tamo Yana Ado Gen Jerusalem Ilen
(Matyu 21:1-11; Mak 11:1-11; Luk 19:28-40)*

¹² Naa anī ile di, tamo kayau musei Sifa bun disin, Jesus Jerusalem isif ya anī karī den. ¹³ Idi pam aarau anã aarau gen anī guri de, Jesus tarabã difiyēf nigin dile fen, diweig diron,

“Hosiana!*

“Odug yana bunem isif, ĩ el fiya ado!”†

“Israel neid King, ĩ el fiya ado!”

¹⁴ Jesus donki naal fotou fe fen, teten ibodon, are Negur nē Itotoya eig ye irok kilei,

¹⁵ “To kumīg, Saion nē tamo kayau,
uleg, āgenei king,

donki naal teten ibod ken, isif.”‡

* **12:13:** Anī nē gariya, ‘Usennamā!’ Od anī tamo kayau Negur yana yaleseya nigin wogō dedig. † **12:13:** Sam 118:25, 26

‡ **12:15:** Sekaraia 9:9

¹⁶ Uruwa bagai, in dō fiya tar, enei ganan nigin wedereid fokōya san. Dum Negur Jesus fula fiya medeīya ifenē di, enei ī nigin ditoton ado, enei tamo kayau ī bun age difen anī, wedereid fokō yen.

¹⁷ Tamo kayau Jesus geid difar fen, ī Lasarus matmat bun tamal iweigne ken, laa bun tamal turī fe di, lo difen idim wogagā def, dile di, od iyokelen. ¹⁸ Tamo kayau musei, Jesus memelik anī inon karī den nigin, ī fotou difiyēf nigin dilen. ¹⁹ Age dife di, Farisia tamo idi abob dirokenen, “Ulegef, ada kabī ege talegef. Lo gouf are, tamo kayau ganan ī dō difiyek!”

Jesus Yogon Laa Nigin Iron

²⁰ Sifa bun Negur yana dalesauf nigin diselen idi atun, Grik tunī difaren. ²¹ Idi Filip Betsaida tamal Galili teneub bun, ī garan disi fen, to difiyē diron, “Tamo biya, amā Jesus mailau fenē.” ²² Age de di, Filip ile, Endru iroken ken, uruwom Jesus dirokenen.

²³ Jesus idi irokenēdin, “Negur Tamo Naal fula fiya medeīya ifenēf nigin, sain anī mogo yeir isil. ²⁴ Aya ā momoi bagai arokeneik, wit faat taka teneub bun kubū ye fen, to burauf are, faat tekelei dogol agef ibodōf, anī ere, ī burauf are, faat musei wowā douf. ²⁵ Tamo ī yogon mata nigin wau laa fef are, ī mata anī itornēf, anī ere, tamo ī teneub enei bun, yogon mata atorok bagai ye fen, itorok are, ī ironnek ile, mata ibodkeleya bun ilauf. ²⁶ Taka ī aya arunau yalef, ī aya dō fiyauf bagai. Aya abodok nē an, neu kabī tamo

ĩg an ibodõf. Taka ĩ arunau yalef, neu Dei ĩ yana yalesauf.

²⁷ “Gama neu wau morok, anĩ aya ere auf? ‘Dei sain enei bun usenna,’ auf de? Sã, gariya enei nigin bagai, sain enei bun asin. ²⁸ Dei ogo yanã selĩ kulõ!”

Age ye di, ait taka saa ilunem isin, “Aya mogo anĩ selu abin, aya baban anĩ selu abiyouf.” ²⁹ Tamo kayau an difaren anĩ karĩ de fen, diron, kolimei den, tunĩ diron, engel takam wogõ fiyem.

³⁰ Jesus iron, “Ait enei, ã isenneĩ di, momoi gouf nigin, aya nigin sã. ³¹ Gama Negur ĩ, teneub enei nẽ tamo kayau es fedif, gama teneub enei nẽ mudur iruwauf. ³² Anĩ ere, aya tenebur tamal dalesnauf sain, aya tamo ganan aya bun, didĩ afediyouf.” ³³ Jesus yogo naig fe, laa foug anĩ ifelnẽdiyof nigin, od enei wogõ yen.

³⁴ Tamo kayau aiten dale diron, “Lo bun amã Kristus gai gai ibodõf ya anĩ karĩ maun, naig fe di, õ urok, ‘Tamo Naal ĩ dalesnẽf bagai?’ Ai anĩ Tamo Naal?”

³⁵ Age de di, Jesus idi irokenẽdin, “Sain naal bagai ã lalan adouf. ã lalan ado mog, uyõg, anĩ bunem gugum to irusi kerũ yeĩf. Tamo ĩ gugum bun iyok, ĩ naib ilef are keleĩ sã. ³⁶ ã lalan ado mog, ãgenei momoiya lalan bun unog, ago gouf, ã lalan gere tar wowã gouf.” Jesus od enei wogõ yel fen, ĩ itorneĩd ile, iminkelen.

Juda Tamo Kayau Jesus Nigin Fau To Momoi Den

³⁷ Jesus idi meleid bun memelik musei inodin, anĩ ere, idi fau ĩ nigin to momoi den. ³⁸ Enei are profet Asaia nẽ od kisi falauf nigin wõ yen:

“Odug, aim nemã od nigin momoi yen?
Aiyai bun Odug nẽ megeir yaor fen?”

³⁹ Gariya enei nigin, idi momoiya kisi feleya sã, ere nigin, Asaia baban od enei iron:

⁴⁰ “Negur idi meleid ifofa ken,
 waud ifofakelen,
anĩ bunem, idi meledim ileyã kisi feleya sã,
 waud fokõya kisi feleya sã,
 waud faleiya kisi feleya sã, age fiya sam, aya
 el afedim.”§

⁴¹ Asaia od enei iron, ere nigin, ĩ Jesus nẽ fula fiya medeĩya ile fen, ĩ nigin iron.

⁴² Mudur adodo idi atun, museig ĩ nigin momoi den. Anĩ ere, Farisia tamo idim Juda neid uub fõ bun dirudidiya nigin kumĩ de fen, dogo neid momoiya to yaor difen. ⁴³ Ere nigin, idi Negurem yeneid yaleseya ban, tamom yeneid dalesauf anĩ orodidig.

⁴⁴ Jesus iweig iron, “Tamo ĩ aya nigin momoi yef, ĩ aya nigin dogol to momoi yef, ĩ aya sur fiyan nigineg momoi yef. ⁴⁵ ĩ aya lo fiyaf, im aya sur fiyan anĩ ilef. ⁴⁶ Aya lalan anĩ, tenebur ein asin, are taka ĩ aya nigin momoi yef, ĩ gugum bun to ibodõf nigin age afen.

⁴⁷ “Taka ĩ neu od karĩ ye fen, to dõ fef, aya ĩ to es afiyek, ere nigin, aya tamo kayau es fiya

§ 12:40: Asaia 6:10

nigin to asin, aya kel gei fiya nigin asin. ⁴⁸ Taka ï aya itorna fen, neu od to irouf, ï nigin es fiya tamo ibodok. Od de wogõ aun anim, idikeleya naa bun ï es fiyēf. ⁴⁹ Ere nigin, aya neu kisi nem to wogõ aun, anï ere, Dei aya sur fiyan im, ere anï wogõ auf, naig afe wogõ auf anï, toli fiya di, wogõ aun. ⁵⁰ Aya keleï, yogon si fiya are mata faimud ibodkeleya bun ileyā nē, anï nigin, ereb aya wogõ auf, Dei aya wogõ auf nigin irokanan kilei bagai, aya wogõ auf.”

13

Jesus In Dō Fiya Tar Yeid Kulo Fedin

¹ Pasa nē Sifa fau wōya sā mog, Jesus kelein, ï teneub enei itor ken, Tama garan ileyā nē sain mogo wō yel. ï yogon tamo tar tenebur ein dibodok anidi nigin wau laa fedig, ï idi nigin wau laa fen are iroule idikeleya bun.

² Bō saaf dō mog, Satanem Judas Iskariot, Simon naal namen Jesus kiwai imeid bun ifenēf nigin, kisi mogo ifenen. ³ Tama ï ereb ereb ganān, Jesus ima bun inon, ï Negur bunem isin anï, Negur bun kel ilef, are Jesus ï keleï. ⁴ Jesus saaf bun ibodon anï fā ye, yogon kolos teten inukeis fen, taul yale, luwa gu fen. ⁵ Age fel fen, ï naan yale, beï bun yu ken, yogon dō fiya tar yeid kulo fiya gariya inon, agef fen, taul luwa gu fen anim yeid waï fedin.

⁶ Jesus Simon Pita garan isi di, ï Jesus irokenen, “Odug, õ aya yeu kulo wou fenē de?”

⁷ Jesus Pita aiten yale irokenen, “Ereb aya age afef, ò gama keleĩ sã, anĩ ere, fau dum ò keleĩ youf.”

⁸ Pita iron, “Aya yeu to bagai kulo wouf.”

Jesus Pita irokenen, “Aya ò to kulo ayõf are, ò aya ado nigal fiya sã.”

⁹ Simon Pita Jesus irokenen, “Odug, agouf are, yeu dogol sã, imau mudurou adog kulo wouf.”

¹⁰ Jesus aiten yale iron, “Taka ã naan igukelel, ye dogol kulo fouf, bouwa ganan filiya. Æ filiya ba, anĩ ere, ã ganan sã.” ¹¹ Jesus ã aibem kiwai ifenẽf anĩ keleĩ, anĩ nigin, ganan filiya sã yen.

¹² Jesus yeid kulof bure fel fen, yogon kolos ifounkel, yogon modoũ bun kelen. Agef fen, ã idi to fedin, “Aya ereb ã bun age afel anĩ, ã wedereĩ fokõ yef de? ¹³ Æ aya ‘Tise’ ado ‘Odug’ gedig, are tutuk, ere nigin, aya de anĩ. ¹⁴ Aya ãgenei Tise ado Odug, ã yeĩ kulo afel, anĩ nigin, ãg abob ye kulo gouf. ¹⁵ Aya malakanon anokeneim, are ã nigin age afel gen, ãg ago gouf. ¹⁶ Aya ã momoi bagai arokeneik, ferfer takam yogon odug to wal fiyẽdig, arũ tamom ã sur fiyen to wal fiyẽdig. ¹⁷ Gama ã enei keleĩ, anĩ nigin, enei dõg ago gouf are, ã el yeif.

Jesus ã Kiwai Imeid Bun Inenẽf Nigin Iron
(*Matyu 26:20-25; Mak 14:17-21; Luk 22:21-23*)

¹⁸ “Aya ã ganan nigin to wogõ auf. Aya agirnẽdin idi, aya keleĩ, anĩ ere, enei are Negur nẽ Itotoya bun yenek anĩ kisi falauf nigin, ‘Taka

ĩ aya urom neu bret moko, ĩ aya kiwai ifana fen, dā fiyal.’*

¹⁹ “Anĩ fau to wõ ye mog, gama aya ã arokeneik, anĩ bunem, anĩ wõ youf sain bun, aya de Im ya anĩ momoi gouf. ²⁰ Aya ã momoi bagai arokeneik, taka ayam sur afe di, ĩ yalef are, ĩ aya yaleyaf, taka ĩ aya yaleyaf are, ĩ aya sur fiyan anĩ yalef.”

Jesus Judasem Kiwai Ifenēf Yen

(Matyu 26:20-25; Mak 14:17-21; Luk 22:21-23)

²¹ Jesus od enei wogõ yel fen, ĩ wau moro ken, kurõ feis iron, “Aya ã momoi bagai arokeneik, āgenei takam aya kiwai ifanauf.”

²² Yogon dõ fiya tar idi abob loli difen, ai nigin bagai wogõ yef de fen, nene den. ²³ Idi neid taka, dõ fiya taka Jesus ĩ nigin wau laa fedig ĩ, Jesus sirin ibodon. ²⁴ Simon Pita, dõ fiya tamo enei mudurem fiye ken, ĩ iron, “Ĩ ai nigin irok anĩ to wiyē.”

²⁵ Dõ fiya tamo anĩ, Jesus akoron mudur isen ken, to fen, “Odug, õ ai wof?”

²⁶ Jesus aiten yale iron, “Tamo bret enei beĩ bun nu afe fen, afenēf anĩ.” Age ye fen, ĩ bret nuf fen, Judas Iskariot, Simon naal ifenen ²⁷ Judas bret anĩ yale di, Satan ĩ namen ilen.

Jesus Judas irokenen, “Ereb agou fenē, kaisã bagai ago.” ²⁸ Anĩ ere, saaf bun dibodon anĩ takam, ere nigin Jesus od enei Judas irokenen anĩ, kisi to fokõ yen. ²⁹ Judas ĩ moni lo fiya tamo nigin, tunĩ kisi difen, Sifa nē erēb erēb na yalouf nigin be, maleg erēb erēb ifenēdiya nigin be, Jesusem

* **13:18:** Sam 41:9

Judas irokenē di, ilef den. ³⁰ Judas ī bret yale fen, kaisā bagai oreis ilen. Sain anī bō.

Pita Nē Wa Fiya Nigin Jesus Iron

(Matyu 26:31-35; Mak 14:27-31; Luk 22:31-34)

³¹ Judas iya ile di, Jesus iron, “Gama Tamo Naal fula fiya medeīya yale di, Negur fula fiya medeīya Tamo Naal bun yalef. ³² Negur fula fiya medeīya Naal bun yalef are, Negur ī fula fiya medeīya Yogo bun Naal ifenēf, fula fiya medeīya anī kaisā bagai Naal ifenēf.

³³ “Neu kesu tar, aya ā geid sain naal bagai tabodōf. Ā aya umirnagauf. Aya Juda tamo arokenēdin kilei, gama ā arokeneik, aya elef nē an, ā isiya kisi feleya sā.

³⁴ “Aya itāfiya mata afeneik, abob nigin wauī laa fouf. Aya ā nigin wau laa fedig kilei, āg abob nigin wauī laa foug bagai. ³⁵ Ā abob nigin wauī laa foug, anī bunem tamo ganan idi keleī youf, ā neu dō fiya tamo tar.”

³⁶ Simon Pita Jesus to fiyen, “Odug, ō nai ulef?”

Jesus iron, “Aya elef nē an, ō gama aya dō fiyaya kisi feleya sā, anī ere, ō fau dum dō wouf.”

³⁷ Pita to fen, “Odug, ere nigin gama aya ō dō yōya kisi feleya sā? Aya ō nigin neu mata atorōf.”

³⁸ Age ye di, Jesus iron, “Ō aya nigin ogon mata utorōf de? Aya ō momoi bagai arokonok, tataro fau kokorok yeya sā mog, ō aya nigin wa wo, towo wouf!

14

Jesus In Dō Fiya Tar Neid Waud Wā Fen

¹ “Ã wauĩ to morõ yeĩ. Negur nigin momoi gouf, aya nigineg momoi gouf. ² Neu Dei nẽ fõ bun aab musei ado, age fiya sam are, arokeneim. Aya eselef nẽ an, ãgenei modoũ dodok afouf. ³ Aya esel, ãgenei modoũ dodok afel fen, aya ã geid tabodõf nigin, aya kelau gei ayeĩf, are ãg aya abodok nẽ an ubodõgouf nigin. ⁴ Aya eselef nẽ naab anĩ, ã keleĩ.”

Negur Bun Ileya Naab, Jesus

⁵ Tomas Jesus irokenen, “Odug, õ narib ulef are, amã keleĩ sã, anĩ nigin, naig mafe fen, amã naab anĩ keleĩ youf?”

⁶ Jesus Tomas irokenen, “Aya dogol naab anĩ, aya dogol momoi anĩ, aya dogol mata anĩ. Taka ã naab taka bunem, Dei wagen to isiyouf, aya bunem dogol. ⁷ ã aya keleim are, ã neu Deig keleim. Gama sain enei bun ilauf, ã ã keleĩ, ã ulegel.”

⁸ Filip iron, “Odug, Tamada ufelnamã, anĩ amã nigin deuf.”

⁹ Jesus iron, “Filip, aya ã geid sain meluk tabodon, anĩ ere, õ aya keleĩ sã de? Taka ã aya ileyan are Dei ilen. Naig fe di, õ urok, “Tamada ufelnamã”? ¹⁰ Aya Dei bun abodok, Dei aya bun ibodok anĩ to momoi wof de? Od aya wogõ ayeik are, aya yug bun tamal sã, are Dei aya bun ibodok ã kabĩ yalef. ¹¹ Aya Dei bun abodok, Dei ã aya bun ibodok anĩ, momoi wiyagauf, sãf are, aya kabĩ aledig bun, momoi wiyagauf. ¹² Aya ã momoi bagai arokeneik, taka ã aya nigin momoi yef, ereb aya age afedig, ãg age fouf, enei age afedig anĩ wal fiyag age fouf, ere nigin, aya Dei gein eselef.

¹³ ã ereb taka nigin, aya yanau nem to gouf, aya age afouf, anĩ bunem, Dei ĩ Naal bun, fula fiya medeĩya yalouf. ¹⁴ Ereb taka nigin, aya yanau nem to wiyagauf are, aya age afouf.

Jesus Awa Uur Fateul Sur Afouf Yen

¹⁵ “ã aya nigin wauĩ laa fouf are, neu ĩtãfiya anĩ dõ gouf. ¹⁶ Aya Dei arokenē di, ĩ Isenneĩya taka, ã geid gai gai ibodõf nigin ifeneĩf, ¹⁷ are momoi nē Awa Uur. Tenebur ein tamo kayau ĩ to dalouf, ere nigin, idi ĩ to dilef, to keleĩ. Anĩ ere, ã ĩ keleĩ, ere nigin, ĩ ã geid ibodok, ã bun ibodõf. ¹⁸ Aya ã madmad gen to atorneĩf. Aya ã gein asiyouf. ¹⁹ Sain naal bagai ile di, tenebur ein tamo kayau, aya to dileyauf, anĩ ere, ã uleyagauf. Aya mata abodok nigin, ãg mata ubodõgouf. ²⁰ Naa anĩ bun, aya neu Dei bun abodok, ã aya bun ubodõgef, aya ã bun abodok anĩ, ã keleĩ youf. ²¹ Taka ĩ neu ĩtãfiya irou dõ fef, ĩ aya nigin wau laa fedig. ĩ aya nigin wau laa fedig anĩ, neu Dei ĩ nigin wau laa fouf, ayag ĩ nigin wau laaf fen, aya yug ĩ bun yaor afouf.”

²² Age ye di, Judas taka (Judas Iskariot anĩ sã) iron, “Odug, ere nigin õ ogo, amã bun dogol õ yaorõf, tenebur ein tamo kayau bun sã?”

²³ Jesus iron, “Taka ĩ aya nigin wau laa fef, ĩ neu od dõ fouf. Neu Dei ĩ nigin wau laa fouf, anĩ amã ĩ gein masi, weim mabodõf. ²⁴ Taka ĩ aya nigin to wau laa fef, ĩ neu od to dõ fouf. Od enei ã karĩ gef, are aya bun tamal sã, are Dei aya sur fiyan nē od.

²⁵ “Aya fau ã geid tabod ken, od enei ganan wogõ ayeyin. ²⁶ Anĩ ere, Isenneĩya, Awa Uur Fateul anĩ, Deim aya yanau nem sur fouf, Awa

Uur Fateul ï, ereb ereb ganan ifelnei ken, aya arokenein anï ganan wedereï fokõf fen, kisi turï foug. ²⁷ Wau inosiya atorkeneik, neu wau inosiya afeneik, aya afeneik are, tenebur ein tamo kayau wau inosiya difeneik gen sã. ã wauï to morõ yei ken, kumïg.

²⁸ “Aya eig au di, karï gel, ‘Aya ele fen, ã gein kelau asiyoug.’ ã aya nigin wauï laa fem are, aya Dei bun elef anï nigin, ã kulïya adom, ere nigin, Dei ï aya wal fiyaya. ²⁹ Anï wõya sã mog, aya mogo arokeneim, anï bunem, agef wõ ye di, ã momoi gouf. ³⁰ Aya ã geid, sain meluk to wogõ tauf, ere nigin, teneub enei nẽ mudur mogo isif. Anï ere, ï aya lai fiyaya nigin megeir sã, ³¹ anï ere, tenebur ein tamo kayau keleï bagai youf, are aya Dei nigin wau laa fef, anï nigin, neu Dei irokanan kilei bagai age afedig.

“Fafãg fen, modoũ enei tatorõg.

15

Aa Wain Gariya Ado Yogon Were

¹ “Aya aa wain bagai, neu Dei ï kabï marau. ² Were aya bun biya to yuk anï ganan, Deim kokour falauf, were biya yuk anï ganan, Deim dẽ fe di, biya musei imauf. ³ Aya od wogõ ayein anim, ã amuyẽ sã, ã mogo filiya. ⁴ ã aya bun ubodõgoug, ayag ã bun abodõf. Were taka aa wain luwa ado to susu falauf are, yogo biya yũya kisi feleya sã. Age fiya bagai, ãg aya bun to ubodõgoug are, biya yũya kisi feleya sã.

⁵ “Aya aa wain gariya, ã were. Taka ï aya bun ibodõ di, ayag ï bun abodõf are, ï biya musei

imauf. Aya utornagauf are, ã erēb taka to ago gouf. ⁶ Taka ï aya bun to ibodōf are, ï were diraille di, meti ledig gen. Were age fediya are gei de fen, yã dirarã di, isasaikediyouf. ⁷ ã aya bun ubodōge di, neu od ã bun ibodōf are, erēb taka oroyei ken, urokanage di, ifeneïf. ⁸ Biya musei ũg fen, neu dō fiya tar wowã gouf are, neu Dei ï fula fiya medeïya yalouf.

⁹ “Neu Dei aya nigin wau laa fedig kilei, ayag ã nigin wau laa fedig. Gama ã neu wau laa fiya anï bun ubodōg. ¹⁰ Aya neu Dei nē ïtãfiya dō afe fen, yogon wau laa fiya bun abodok kilei, ã neu ïtãfiya dō gouf are, neu wau laa fiya bun ubodōgouf. ¹¹ Aya enei arokeneim, are neu kulïya ã namein ibod ken, ãgenei kulïya barikãf nigin. ¹² Neu ïtãfiya are yeir, aya ã nigin wau laa fedig gen, ãg abob nigin wauï laa fouf. ¹³ Wau laa fiya enei wau laa fiya ganā wal fiya, are yogon mou tar nigin yogon mata itorok anï. ¹⁴ ã aya erēb ïtãfiya arokenein anï dōg, ago gouf are, ã neu mou tar. ¹⁵ Aya baban ã to ferfer ayeïf, ere nigin, ferfer ï yogon tamo odug nē kabï keleï sã. Anï ere, aya ã neu mou tar ayeim, ere nigin, erēb erēb ganā aya Dei bun karï aun anï, aya ã afelneim. ¹⁶ ãgem aya to ugirnagen, aya ã agirnei ken, uleg, biya ũg fen, biya anï ibodkalauf nigin ã ayein. Agog fen, aya yanau nem, erēb taka nigin Dei urokenēge di, ifeneïf. ¹⁷ Enei anï neu ïtãfiya, abob nigin wauï laa fouf.

*Tenebur Tamo Kayau, Dō Fiya Tamo Tar Nigin
Kiwai Difenēdiyof*

18 “Tenebur tamo kiwai difeneif are, aya ketem kiwai difanan anī, ā keleī youf. 19 Ā teneub enei nēf are, ā yogon nigin, ā nigin wau laa fouf. Anī ere, ā teneub enei nē sā, aya ā tenebur tamal gei ayei ken, agirnein. Anī nigin, tenebur ein ā kiwai difeneik. 20 Aya od arokenein anī, ā karī walagauf, ‘Ferfer taka yogon odug to wal fedig.’* Idi aya darau difanan are, āg age de darau difeneif. Idi neu od dō difen are, idi āgeneig age de dō difouf. 21 Idi enei ganā ā bun age difouf, ere nigin, aya yanau ā ado, are aya sur fiyan idi ī keleī sā nigin. 22 Aya to asi fen, arokenēdim are, idi mosor sam. Anī ere, idi neid mosor nigin to galā dūf. 23 Taka ī aya kiwai ifanaf, ī neu Deig kiwai ifenek. 24 Taka nem to age fen anī, aya idi atun to age afem are, idi mosor sam. Anī ere, gama idi memelik dile fen, aya neu Dei ado kiwai difanaman. 25 Anī ere, enei, idi neid Lo bun ditoton yenek anī, kisi falauf nigin, ‘Idi aya mura sā kiwai difanan.’†

26 “Awa Uur Isenneiya are, ayam Dei bun tamal ā bun sur afe di, isiyouf, are momoi nē Awa Uur, Dei bun tamal ulō yeis isi fen, ī aya nigin kurō fesiyouf. 27 Āg agog kurō wesigouf bagai, ere nigin, ā aya geid fen, gariya bunem tasin.

16

1 “Ā to felu rogouf nigin, od enei ganā mogo ā wogō ayeim. 2 Idi ā Juda neid uub fō bun diruyeif. Takag, sain fau isiyouf bun, taka ī ā ideneikeis fen, kisi fouf, Negur sesewi afiyek youf. 3 Idi enei

* 15:20: Jon 13:16 † 15:25: Sam 35:19; 69:4

age difouf, ere nigin, idi Dei keleĩ sã, aya nigineg keleĩ sã. ⁴ Aya enei mogo arokeneim, are sain isiyouf bun, ã wedereĩ aroul anĩ, karĩ walagauf nigin. Aya enei tetun to arokenein, ere nigin, aya ã geiden.

Awa Uur Fateul Nẽ Kabĩ

⁵ “Gama aya ĩ sur fiyan gein eselef, anĩ ere, ã takam to aya to fiyaf, ‘Õ nai ulef?’ ⁶ Aya enei arokeneim nigin, ã fatuk bagai wauĩ gudũ fef. ⁷ Anĩ ere, aya momoi arokeneik, aya ãgenei biya fiya nigin eselef. Aya to eselauf are, Isenneĩya anĩ ã bun to isiyouf, aya eselauf are, aya ĩ, ã bun sur afouf. ⁸ Sain ĩ isiyouf, tenebur ein tamo kayau bun, mosor nigin, Negur nẽ madur fiya nigin ado, Negur nẽ es fiya nigin, idi neid kũ fenẽya anĩ yaor fe, faded fediyouf. ⁹ Mosor are, idi aya nigin to momoi def nigin. ¹⁰ Negur nẽ madur fiya are, aya Dei gein esele di, ã aya to uleyagauf nigin. ¹¹ Negur nẽ es fiya are, teneub enei nẽ mudur mogo es fiyen nigin.

¹² “Aya ã irokeneĩya nigin musei biya, anĩ ere, ã gama keleĩya kisi feleya sã. ¹³ Anĩ ere, sain momoi nẽ Awa Uur isiyouf bun, momoi nẽ anĩ ganan bun, im itoneĩf. ĩ yogon kisim to wogõ youf, er eb ĩ karĩ yef anĩ wogõ youf, agef fen, er eb fau wõ youf anĩ irokeneĩf. ¹⁴ ĩ neu bun tamal yale fen, ã ifelneĩf, anĩ bunem, aya fula fiya medeĩya ifanauf. ¹⁵ Dei nẽ ganan are neu, anĩ nigin, aya arom, Awa Uur neu bun tamal yale fen, ã ifelneĩf aul.

¹⁶ “Sain naal bagai ile di, ã to uleyagauf, agef fen, baban sain naal bagai ile di, aya uleyagauf.”

In Dō Fiya Tar Waud Gudū Fef Are Fau Kulī Douf

¹⁷ In dō fiya tar tunī abob dirokenen, “Ere gariya nigin eig ye irok, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?” ¹⁸ Idi anī fau fau wogō den, “Ī ere ye fen, ‘sain naal bagai’ yen? Ī irok anī, amã gariya keleĩ sã.”

¹⁹ Idi enei nigin Jesus to difou fenē mog, Jesus anī ile fen, idi irokenēdin, “Aya eig aul anī nē gariya nigin abob to wiyēgef de, ‘Sain naal bagai ile di, ã to uleyagauf, agef fen, baban sain naal bagai ile di, aya uleyagauf?’” ²⁰ Aya ã momoi bagai arokeneik, ã fau maruĩ isi fen, wauĩ gudū foug, tenebur tamo kayau kulī de mog. ã wauĩ gudū foug, anī ere, āgenei wauĩ gudū fiya falei yel kulī youf. ²¹ Kayau kesu ibodō fenē darau fef, ere nigin, yogon naa wō yel, anī ere, yogon kesu wō ye di, darau weder tu kelef, ere nigin, kesu tenebur wō yel nigin kulī yef. ²² Āg age fiya, gama āgenei wauĩ gudū fiya nē naa, anī ere, aya baban ailiyeĩ di, ã kulī gouf, taka nem āgenei kulīya to yalelkeneĩf. ²³ Naa anī bun, ereb taka nigin ã to, to wiyagauf. Aya ã momoi bagai arokeneik, aya yanau bunem, ereb taka nigin neu Dei to wiyēgouf are, ifeneĩf. ²⁴ Uruwa bunem isi gama, aya yanau nem, ereb taka nigin to, to gen. To gouf, walogouf, ago gouf, ã kulīya barikāf.

²⁵ “Aya yaab od wogō audig, anī naa taka isiyouf bun, aya yaab od to wogō auf, anī ere, neu Dei nigin yaor arokeneĩf. ²⁶ Naa anī bun, aya yanau bunem to gouf. Aya ã nigin Dei to afiyēf ya anī

to arokeneik, ²⁷ ere nigin, ã aya nigin wauĩ laaf fen, aya Negur bun tamal asin anĩ, momoi gedig nigin, Dei ã nigin wau laa fedig. ²⁸ Aya Dei bun tamal ulõ aus fen, tenebur asin, gama aya teneub enei ator ken, Dei bun kelauf.”

²⁹ Age ye di, Jesus nẽ dõ fiya tar diron, “Gama õ yaor wogõ wof, yaab od nem sã. ³⁰ Gama amã mailef, õ ereb ereb ganan keleĩ, are taka nem to yõf anĩg to tari wodig. Anĩ bunem, õ Negur bun tamal usin anĩ, momoi mauf.”

³¹ Jesus aitedin yale iron, “Ã gama momoi gef de? ³² Anĩ ere, naa fau isif, are mogo isil, anĩ bun, ã firagagaũ yeĩ, ãgenei fonõ fonõ yeĩf. ã aya mugu utornagauf. Anĩ ere, aya mugu sã, ere nigin, neu Dei ã aya ado.

³³ “Ã aya bun wauĩ inosiya adouf nigin, od enei arokeneim. Tenebur ein ã morõ adouf, anĩ ere, totol ado ufaragauf! Aya teneub enei nẽ megeir mogo wal afen.”

17

Jesus Yogo Nigin Kosẽ Yen

¹ Jesus od enei wogõ yel fen, saa ilun itad fen, kosẽ yen:

“Dei, naa mogo isil, fula fiya medeĩya õ Naal wenẽ, ago di, õ Naal õ selĩ kulõ fouf.

² Are õ Naal, idi ganan õ wenen bun, mata faimud ibodkeleya ifenẽdiyof nigin, tamo kayau ganan lo fediya nẽ megeir õ wenen.

³ Mata faimud ibodkeleya are yeir, õ momoi Negur tekelei ado Jesus Kristus õ sur won anĩ, idi keleĩ youf anĩ. ⁴ Kabĩ õ wanan anĩ adikelen

bunem, tenebur ein aya ò bun fula fiya medeïya arou asin. ⁵ Dei, teneub kare fiya sã mog, ada urom fula fiya medeïya adon anï, ò malã bun fula fiya medeïya anï gama wana.

Jesus In Dõ Fiya Tar Nigin Kosë Yen

⁶ “Aya teneub enei bun tamal ò wanan idi bun, ò yaor ayon. Idi ogon, anï ere, ò idi wanan, ago di, idi ogon od dõ difedig. ⁷ Gama idi keleï, ereb ereb ganan aya wanan are ò bun tamal. ⁸ Aya od wanan anï afenëdi di, idi dalen. Aya ò bun tamal asin anï, idi momoi bagai kelein, idi onom aya sur wiyan anï momoi den. ⁹ Aya idi nigin kosë auf. Aya teneub enei në tamo kayau nigin to kosë auf, anï ere, idi ò wanan anidi nigin kosë auf, ere nigin, idi ogon. ¹⁰ Neu ganan are ogon, ogon are neu. Idi bunem, aya fula fiya medeïya alel. ¹¹ Aya tenebur ein to abodõf, anï ere, idi fau tenebur dibodok, aya ò gein esef. Dei Fateul, ò yanã wanan në megeir bunem, kulatun wediyouf, anï bunem, ada tekelei gen idig tekelei youf. ¹² Sain aya idi geid mabodon, ò aya yanã wanan anï bunem, kulatun afeid el afen. Taka to fõ yelen, tamo ï fõ yalauf në dogol fõ yelen, are Negur në Itotoya kisi falauf nigin.

¹³ “Gama aya ò gein esef, neu kuliya idi namedin barikãf nigin, tenebur ein fau abod ken, od enei arok. ¹⁴ Aya ogon od afenëdi di, teneub enei në tamo kayau idi kiwai difenëdin, ere nigin, gama aya teneub enei në sã, age fiya gen, idig teneub enei në sã. ¹⁵ Aya teneub enei bun tamal walelnëdiyof nigin to kosë auf, anï ere, wadãgen tamo sane isi fen, daũ fediya

nigin, kulatun wediyouf anĩ kosẽ auf. ¹⁶ Aya teneub enei nẽ sã, age fiya gen, idig teneub enei nẽ sã. ¹⁷ Momoi bunem fateul unenẽdiyof, ogon od are momoi. ¹⁸ Õ teneubur ein sur wiyan gen, ayag teneub enei bun sur afiyẽdin. ¹⁹ Idi nigin, aya yug adok bagai afonok, are idig momoi bagai dogo adok Negur difenẽf nigin.

*Jesus Momoiya Tamo Kayau Ganan Nigin Kosẽ
Yen*

²⁰ “Aya neu kosẽya are idi nigin dogol sã, idi neid od bunem, aya nigin momoi douf anidi nigineg, aya kosẽ auf, ²¹ idi ganan tekelei youf nigin kosẽ auf, Dei õ aya bun ubodok, aya õ bun abodok gen, idig ada bun dibodõ di, teneub enei nẽ tamo kayau, onom aya sur wiyan anĩ, momoi douf nigin. ²² Fula fiya medeĩya õ wanan anĩ, idi afenẽdin, are ada tekelei gen, idig tekelei youf nigin. ²³ Aya idi bun, õ aya bun, are idi tekelei youf nigin, anĩ bunem, onom aya sur wiya fen, aya nigin waũ laa fedig gen, idi nigineg waũ laa fedig anĩ, teneub enei nẽ tamo kayau keleĩ youf.

²⁴ “Dei, idi õ aya wanan anidi, aya abodok nẽ an, aya geid mabodõf anĩ orouf, are idi neu fula fiya medeĩya dilouf nigin, fula fiya medeĩya anĩ teneub kare fiya sã mog, õ aya nigin waũ laaf fen, wanan anĩ.

²⁵ “Dei madur bagai, teneub enei nẽ tamo kayau idi õ keleĩ sã, anĩ ere, aya õ keleĩ, neu dõ fiya tar idi, onom aya sur wiyan anĩ keleĩ. ²⁶ Aya õ anĩ afelnẽdi di, idi õ keleĩ, õ nigin fau fau afelnẽdif

alauf, are ò aya nigin waũ laa fiya anĩ, idi bun ibodõf ado, ayag idi bun abodõf nigin.”

18

Jesus Dirounen

(Matyu 26:47-56; Mak 14:43-50; Luk 22:47-53)

¹ Jesus od enei wogõ yel fen, ï yogon dõ fiya tar geid, Kidron naan uus atu dilen. Kidron sitakã kabĩ taka ibodon, ï yogon dõ fiya tar geid, kabĩ atu dilen.

² Kiwai tamo Judas ï modoũ anĩ keleĩ, ere nigin, sain musei Jesus in dõ fiya tar geid an guru difedig. ³ Anĩ nigin, Judas, kusĩ tamo tunĩ ado, tempel lo fiya tamo tunĩ pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusĩ nẽ waila guri de fen, dilen.

⁴ Jesus, ï bun wõ youf anĩ ganan kelein, ï iyok ile to fedin, “Ã ai umirnẽgef?”

⁵ Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren. ⁶ Sain Jesus iron, “Aya im,” ye di, idi soso de dile, tenebur kuku den.

⁷ Jesus baban idi to fedin, “Ã ai umirnẽgef?”

Idi diron, “Jesus Nasaret tamal.”

⁸ Jesus iron, “Aya ã arokeneim, aya im. Aya anĩ umirnagauf are, tamo eneidi utornẽdig len, dile.”

⁹ Agef iron are, od Jesus wogõ yen anĩ kisi falauf nigin, “Aya ò wanan anidi taka to folõ afelen.”*

* **18:9:** Jon 6:39

¹⁰ Age dife di, Simon Pita ï, dimig adon anï ul feis yale, pris neid mudur nê ferfer weder biya melem salôf iran. Ferfer anï yana Malkus.

¹¹ Age fe di, Jesus Pita irokenen, “Ogon dimig yogon modoũ bun kel uno! Dei aya naan kap ifanan anï, aya to ãf de?”

Jesus Anas Garan Dirou Dilen

¹² Age ye di, kusï tamo, nedi mudur, Juda neid tempel lo fiya tamo geid, Jesus dalen. Idi ï difo ken, ¹³ Anas garan ket dirou dilen, Anas ï, Kaiafas ne ten, yar anï bun Kaiafas ï pris neid mudur ibodon. ¹⁴ Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

Pita Jesus Nigin Wa Fen

(Matyu 26:69, 70; Mak 14:66-68; Luk 22:55-57)

¹⁵ Simon Pita, Jesus nê dô fiya tar taka ado, Jesus dô difen. Pris neid mudur, dô fiya tar taka anï keleï, anï nigin, ï Jesus ado, pris neid mudur nê fofomalan kau namen dilen. ¹⁶ Anï ere, Pita ï serê bobogen ifaren. In dô fiya taka ï pris neid mudur ï nigin keleï, ï baban serê ke len, bobog lo fiya kayau iroken ken, Pita yale irou, namen dilen.

¹⁷ Kabï kayau bobog lo fedig ï, Pita to fiyen, “Ôg be, in dô fiya tamo taka anï sã de?”

Pita iron, “Aya sã.”

¹⁸ Menig nigin, ferfer, tempel lo fiya tamo geid, yã kũ de fen, salili de, bouweid diroron. Pita ïg weim difar fen, bouwa ironon.

Pris Neid Mudur Jesus To Fiyen

(Matyu 26:59-66; Mak 14:55-64; Luk 22:66-71)

19 Fõ namen, pris neid mudur, Jesus ï, in dõ fiya tar nigin ado, yogon od tai fedin nigin to fiyen.

20 Jesus solof iron, “Aya tamo kayau atun, mala yaor wogõ aun. Aya sain faimud Juda neid uub fõ bun be, tempel bun, Juda tamo kayau ganan guru de mog, wogõ audig. Aya iminēyan taka to wogõ aun. 21 Ere nigin anī aya to wiyaf? Idi aya wogõ au di, karī difiyan onou idi to wiyeïd. Ereb aya wogõ aun, idi keleï.”

22 Jesus age ye irõ di, tempel lo fiya tamo taka non ifaren anim, Jesus wala fãf fen, iron, “Pris neid mudur anī, õ ago urokenēdig de?”

23 Jesus solof irokenen, “Aya erëb kũ fenēya arom are, õ erëb kũ fenēya anī urõf. Anī ere, aya momoi arom are, ere nigin õ walau fã wol?”

24 Age ye di, Anas Jesus difon ado, pris neid mudur Kaiafas gein sur fen.

Pita Jesus Nigin Baban Wa Fen

(Matyu 26:71-75; Mak 14:69-72; Luk 22:58-62)

25 Simon Pita bouwa irorouk ifar mog, idi ï to difiyan, “Õg be, in dõ fiya tamo taka anī sã de?”

Ï waf fen, iron, “Aya sã.”

26 Pris mudur nē ferfer taka, ï Pitam weder salõf iran nē sirag anim iron, “Aya õ ï urom kabier to ailiyeim de?” 27 Pita baban waf mog, kaisã bagai tataro kokorok yen.

Jesus Pailat Mala Bun Ifaren

(Matyu 27:1, 2, 11-31; Mak 15:1-20; Luk 23:1-25)

28 Age fe di, Juda tamo, Jesus Kaiafas bun tamal dale dirou, Rom gawaman mudur nē fõ bun dilen.

Are bonimei bagai, Juda tamo idi Pasa nē saaf dāf nigin, kal sese de fen, gawaman mudur nē fō namen to dilen. ²⁹ Anī nigin, Pailat idi gedin ulō yeis isi fen, to fedin, “Ere od ā tamo enei bou bun unogouf?”

³⁰ Idi solo de diron, “Ī lo wal fiya tamo sam are, amā ō gein to marou masim.”

³¹ Pailat idi irokenēdin, “Ā aug ĩ waleg fen, āgenei lo bun es wiyēg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.”

³² Are Jesus ĩ naig be fe, laa fouf nigin wogō yen anī, kisi falauf nigin agef wō yen.

³³ Age de di, Pailat aaben kel ile, Jesus iweigne ken, to fiyen, “Ō Juda neid king de?”

³⁴ Jesus solof iron, “Ō ogon kisim od enei urok de, tunim be aya nigin ō dirokono?”

³⁵ Pailat solof iron, “Aya Juda tamo de? Ō ogon tamo kayaum pris odudug geid, aya bun dirousiyom. Ō ere taka tau agon?”

³⁶ Jesus iron, “Aya neu tano teneub enei nē sã. Aya neu tano teneub enei nem are, neu kabī tamo, Juda tamom aya to daleyauf nigin kusī dem. Anī ere, neu tano teneub enei nē sã.”

³⁷ Age ye di, Pailat Jesus irokenen, “Age fouf, ō king de?”

Jesus solof iron, “Ō ogo yer urok, aya king. Enei nigin aya wō aun, are momoi anī wogō auf nigin, anī nigin, aya tenebur asin. Momoi nē ganan, aya karī difiyadig.”

³⁸ Pailat to fen, “Ere anī momoi?” Age yel fen, ĩ baban Juda tamo gedin serē ile, idi irokenēdin,

“Aya ï bun mosor taka to ailef. ³⁹ Anï ere, ãgenei tobonuneï eig fiya, Pasa naa bun, kalabus tamo taka aliskeneïdig. Æ Juda neid king aliskeneïf anï oroyeik de?”

⁴⁰ Idi baban diweig, solo de diron, “Sã, ï sã! Barabas anï wanamãf!” Barabas ï anï bẽ tamal.

19

Pailat Jesus Aa Tetek Bun Dũf Nigin Iron

¹ Age de di, Pailat Jesus yale fen, irõ di, wagï difiyen. ² Kusï tamo malũ duri ado dale, teter tanak kori de fen, ï mudur bun kurũ difiyen. Idi gabar kadaũ dale difounne ken, ³ idi baba baban ï wagen dile fen, diron, “O Juda neid king gai gai ibodõf!” Age de fen, wala fã difen.

⁴ Pailat baban serẽ kel isi fen, Juda tamo irokenẽdin, “Ulegef, aya ï bun mosor taka to ailef anï, ã keleï youf nigin, ï ã gein arou asif.” ⁵ Sain Jesus malũ duri kurũ difiyen, gabar kadaũ difounnen ado, serẽ isi di, Pailat idi irokenẽdin, “Tamo are yeir!”

⁶ Pris odudug, tempel lo fiya tamo geid, ï dile fen, diweig diron, “Aa tetek bun ùf! Aa tetek bun ùf!”

Anï ere, Pailat idi irokenẽdin, “Æ aug waleg, aa tetek bun ùg. Aya ï bun mosor taka to ailef.”

⁷ Juda tamo idi solo de diron, “Amã nemã lo ado, lo anï kilei ï laa fouf, ere nigin, ï yogo aya Negur Naal yedig.”

⁸ Od enei Pailat karï ye fen, fatuk bagai kumï yen. ⁹ ï baban fõ aaben kel ile fen, Jesus to fiyen, “Õ nain tamal?” Anï ere, Jesus aiten to yalen.

¹⁰ Pailat Jesus irokenen, “Õ aya od to urokanauf de? Aya ò kafī fiya bun tamal yalelnōya nigin megeir ado, ò aa tetek bun inōya nigineg megeir ado anī, ò keleī sã de?”

¹¹ Jesus solof iron, “Ilun tamal megeir ò to ifonom are, aya ogon megeir farumen to abodom. Anī nigin, tamo taka ī aya ò imã bun inenan, ī yogon mosor odug bagai, ogon wal fiya.”

¹² Jesus Pailat age fiyē di, Pailat Jesus kafī fiya bun tamal yalisnēf nigin, naab imiren, anī ere, Juda tamo idi diweig diron, “Õ tamo enei utornē di, ilauf are, ò Sisa* nē mou sã. Taka ī yogo anī king yef, ī Sisa kiwai ifenek.”

¹³ Pailat od enei karī ye fen, Jesus serē yale irou isi fen, es fiya tamo nē sia, Meein Bedu dedig modoū bun ibodon (Meein Bedu are, Hibru od nem yana Gabata). ¹⁴ Naa are Pasa Sifa nigin dodok fiya naa, gaa atun age fiya, naa anī ilele di, Pasa naa wō youf.

Pailat Juda tamo idi irokenēdin, “Ãgenei king yeir.”

¹⁵ Anī ere, idi diweig diron, “Uru uraile! Uru uraile! Aa tetek bun ũ!”

Pailat to fen, “Aya āgenei king aa tetek bun aũf de?”

Pris odudug solo de diron, “Amã king taka sã, Sisa dogol.”

¹⁶ Anī nigin, Pailat Jesus aa tetek bun dũf nigin, idi imeid bun inon.

Jesus Aa Tetek Bun Dun

(Matyu 27:32-44; Mak 15:21-32; Luk 23:26-43)

* **19:12:** Rom neid king odug.

Anĩ nigin, kusĩ tamo Jesus dalen. ¹⁷ Ĩ yogon aa tetek faali fe, modoũ Mudur Tuwan (Hibru od nem Golgota dedig) iselen. ¹⁸ An idi Jesus aa tetek bun dun, tamo uru idig, ĩ geid aa tetek bun didenen, idi urom si sitakã, Jesus atun.

¹⁹ Pailat irõ di, eig de ditot fen, aa tetek bun degẽ difen: JESUS NASARET TAMAL, JUDA NEID KING.

²⁰ Juda tamo kayau musei itotoya enei diwesen, ere nigin, Jesus aa tetek bun dun modoũ are taun non. Itotoya are Hibru od nem, Rom od nem, Grik od nem. ²¹ Juda neid pris odudug Pailat dirokenen, “To ‘Juda neid King’ wo utot, anĩ ere, tamo enei yogo aya Juda neid king yen, ago utot.”

²² Pailat aitedin yale iron, “Ereb aya atoton, are de agef ibodõf.”

²³ Sain kusĩ tamo Jesus aa tetek bun du ken, Jesus nẽ kolos gei difeid, aiwa adodo foi difen, are teke tekelei kusĩ tamo mugu mugum gei difen, kolos meluk ilon tamal dogol foi fiya sã. Kolos are meluk tekelei tokõ feleya diwan.

²⁴ Idi abob dirokenen, “Ada anĩ to serek tafouf, ada aisaĩ tara ken, aibem yalouf anĩ tailauf.”

Negur nẽ Itotoya eig ye irok anĩ kisi falauf nigin, agef wõ yen,

“Neu kolos idi atun foi difeid fen,

neu kolos meluk nigin aisaĩ diran.”†

Anĩ nigin, kusĩ tamo idi enei age difen.

²⁵ Jesus nẽ aa tetek sirin, Jesus sina, sina nẽ tura, Maria Kolopas aiwa, Maria Magdala tamal an difaren. ²⁶ Sain Jesus mala irã, sina ado in dõ fiya tamo taka ĩ nigin wau laa fedig non difar

† 19:24: Sam 22:18

mog, ileid fen, Jesus ï sina irokenen, “Kayau, õ naal yeir.” ²⁷ Age ye fen, Jesus yogon dõ fiya tamo irokenen, “Enei ogon sinã.” Naa anĩ bunem ilen, dõ fiya tamo enei sinawau yale, yogon fõ bun iroule, kulatun fiyen.

Jesus Laa Fen

(Matyu 27:45-56; Mak 15:33-41; Luk 23:44-49)

²⁸ Anĩ dumen, Jesus keleĩ, ereb ereb ganan mogo gama bure felel, Negur nẽ Itotoya bun ibodok anĩ kisi falauf nigin, Jesus iron, “Aya naan ail fiyaf.” ²⁹ Wain makik yag ado an ibodon, idi spons dale, wain bun nu dife, aa hisop were bun dino fen, dales, Jesus sigoron dinon. ³⁰ Jesus wain makik anĩ yale fen, iron, “Gama bure.” Age yel fen, guyu kureis, yogon uur itoron.

³¹ Gama naa are dodok fiya nẽ, we fele di, are Sabat naa, Sabat anĩ are, uub odug. Juda tamo idi, Sabat naa bun, bouweid aa tetek bun ifareya ditorõdig, anĩ nigin, idi yeid weweur difeid, bouweid gei difalaisiyouf nigin, Pailat dirokenen. ³² Anĩ nigin, kusĩ tamo disin, tamo taka ket ye weweur difen, takag age difen, idi Jesus geid, aa tetek bun didenen anidi. ³³ Anĩ ere, idi Jesus wagen disi fen, ï mogo laa fen anĩ dilen, anĩ nigin, idi ï ye to weweur difen. ³⁴ Anĩ fotokar, kusĩ tamo takam, ot nem Jesus siri gilĩ fe di, naud naan ado fi felen. ³⁵ Tamo enei ilen im wogõ yen, yogon wogõya are momoi, ï keleĩ, ï momoi wogõ yef, are ãg momoi gouf nigin wogõ yef. ³⁶ Negur nẽ Itotoya enei kisi falauf nigin agef

wõ yen, “Yogon tuwa taka to were fouf,”[†] ³⁷ agef fen, Negur nē Itotoya takag irok, “Idi siri gilī difen tamo ī, idim dilouf.”[§]

Jesus Mũ Difen

(Matyu 27:57-61; Mak 15:42-47; Luk 23:50-56)

³⁸ Anī dum, Josef Arimatea tamal, Jesus bouwa buru yalouf nigin Pailat irokenen. Josef ī, Jesus nē dō fiya tamo taka, anī ere, ī Juda tamo nigin kumī ye fen, iminēyan Jesus dō fen. Pailat yo ye di, ī isi, Jesus bouwa yalen. ³⁹ Josef ī Nikodemus ado fen, disin, kulu tamo anim, bō Jesus gein ilen. Nikodemus ī, marasin yana mer (myrrh) aloi (aloe) ado falei difen anī iroulen, anī nē morō teti kilogram age fiya. ⁴⁰ Idi urom Jesus bouwa dale, marasin ado gabar lalau nem filu difen. Juda neid tamo mũ fiya tobonunā bunem age difen. ⁴¹ Jesus aa tetek bun dun nē modoũ an, kabī taka ado, kabier an, ku mata taka ado, taka an to goro difen. ⁴² Naa are Juda neid dodok fiya nē naa nigin ado, tokō kug melsā nigin, idi Jesus an goro difen.

20

Matmat Gorō Ibodon

(Matyu 28:1-8; Mak 16:1-8; Luk 24:1-12)

¹ Uub nē naa matu Sande bun, bonimei bagai gugum ado, Maria Magdala tamal matmat bun ile fen, mala irā, bobog bun meein yaleleya ilen. ² Anī kayau, Simon Pita, dō fiya taka Jesus ī nigin wau laa fedig anidi gedin gudu ref ile, irokenēdin,

[†] **19:36:** Eksodas 12:46; Namba 9:12; Sam 34:20 **§ 19:37:** Sekaraia 12:10

“Idi Odug matmat bun tamal dale diroulen, ï nain be dinon, ada keleĩ sã!”

³ Anĩ nigin, Pita, dõ fiya tamo taka ado, matmat bun dilen. ⁴ Urom gududu den, anĩ ere, dõ fiya tamo takam Pita wal fe, ï ket matmat bun wõ yen. ⁵ Ï iti ken, fai yen, gabar lalau filu difen anĩ an yen mog, ilen, anĩ ere, ï kuren to ilen. ⁶ Age fe di, Simon Pita dum dõ fiyen, wõ ye fen, tokõ fel, matmat kuren ile, gabar lalau filu difen an yen mog, ilen, ⁷ mũ difen gabar Jesus mudur sile difen anĩg ilen. Mudur sile difen gabar are, yogo fire kori fel, gabar lalau filu difen anĩ firen ibodon. ⁸ Age fe di, dõ fiya tamo taka, ï ket matmat bun wõ yen ïg, kuren ilen. Ï ile fen, momoi yen. ⁹ (Jesus laa bun tamal kel fã youf ya, Negur nẽ Itotoya bun yenek anĩ, idi fau wedereid fokõya sã.)

*Jesus Maria Magdala Tamal Bun Wõ Yen
(Matyu 28:9, 10; Mak 16:9-11)*

¹⁰ Age de fen, dõ fiya tar, nedi fõ bun ke de dilen. ¹¹ Anĩ ere, Maria matmat serẽ inã yalef ifaren. Ï inã ado inã ado iti ken, matmat namen fai yen. ¹² Agef fen, ï, engel uru kolos lalau adodo, Jesus yenen modoũ bun dibod mog, iledin, taka muduren, taka yen.

¹³ Idi ï to difiyen, “Kayau, õ ere nigin inã walef?”

Maria iron, “Idi neu Odug dale diroulen, ï nain be dinon anĩ, aya keleĩ sã.” ¹⁴ Age ye fen, ï falei yel, Jesus an ifar mog ilen, anĩ ere, are Jesusem ya anĩ to kelein.

¹⁵ Jesus iron, “Kayau, õ ere nigin inã walef? Õ ai anĩ umirnek?”

Maria kisi fen, ï kabĩ lo fedig anim ye fen, irokenen, “Tamo biya, onom ï wale uroulen ouf are, nain be unon anĩ, aya urokana di, aya ï alouf.”

¹⁶ Jesus ï irokenen, “Maria.”

Maria ï falei yel, Jesus wage ifen ken, Hibru od nem irokenen, “Raboni!” (anĩ nẽ gariya, Tise).

¹⁷ Jesus iron, “Aya to urouna, ere nigin, aya Dei gein fau kel iseleya sã. Anĩ ere, neu turau tar gedin ule urokeneĩd, ‘Aya neu Dei, ãgenei Temeĩ, neu Negur, ãgenei Negur bun kelau eselauf.’ ”

¹⁸ Anĩ nigin, Maria Magdala tamal, in dõ fiya tar gedin ile irokenẽdin, “Aya Odug ailel!” Age ye fen, Maria Jesus od enei irokenen anĩ, idi wogõ fiyẽdin.

Jesus In Dõ Fiya Tar Meleid Bun Wõ Yen
(*Matyu 28:16-20; Mak 16:14-18; Luk 24:36-49*)

¹⁹ Uub nẽ naa matu Sande aragau anĩ bun, Jesus nẽ dõ fiya tar, Juda tamo nigin kumĩ de fen, sukar kotũ difel, aaben guru de dibod mog, Jesus isi, idi atun ifar fen, iron, “Wau inosiya ã ado ibodõf!”

²⁰ Od enĩ irokel fen, ï ima siri ado idi ifelnẽdin. In dõ fiya tar idi, Odug dile fen, fatuk bagai kulĩ den.

²¹ Jesus baban iron, “Wau inosiya ã ado ibodõf! Dei aya sur fiyan gen, ayag ã sur ayeik.” ²² Age ye fen, idi bun fuu fiyeĩd fen, iron, “Awa Uur Fateul waleg. ²³ Æ, tamo neid mosor nigin, wedereĩ tu kalauf are, idi neid mosor nigin weder tu kelef, ã idi neid mosor nigin, wedereĩ to tu kalauf are, idi neid mosor nigin weder to tu kelef.”

Jesus Tomas Mala Bun Wõ Yen

²⁴ Anĩ ere, Jesus in dõ fiya tar meleid bun wõ yen sain, tuwelf idi neid taka Tomas (yana taka Didimus), idi geid to ibodon. ²⁵ Anĩ nigin, dõ fiya tar tunim ĩ dirokenen, “Amã Odug mailen!”

Anĩ ere, ĩ idi irokenẽdin, “Aya yogon ima bun tuti ba to ailauf, aya imau gege tuti ba bun to ano fen, aya imau siri bun to anouf, aya to momoi auf.”

²⁶ Uub tekelei ilele di, in dõ fiya tar baban fõ bun dibodon, are Tomas geid. Sukar kotũ difedin, anĩ ere, Jesus isi, idi atun ifar fen, iron, “Wau inosiya ã ado ibodõf!” ²⁷ Agef fen, Jesus Tomas irokenen, “Ogon imã gege ein uno, neu imau uleid. Imã urã siru bun uno. Waũ to ilef isif fouf, momoi dogol wo.”

²⁸ Tomas Jesus irokenen, “Neu Odug, neu Negur!”

²⁹ Age ye di, Jesus Tomas irokenen, “Õ malam aya uleyaf nigin, momoi wof. Idi meledim to dile fen, momoi def, are el fedif.”

³⁰ Jesus, in dõ fiya tar meleid bun, memelik musei inodin, are buk enei bun itotoya san. ³¹ Anĩ ere, Jesus ĩ Kristus, Negur Naal anĩ ã momoi ge fen, ĩ yana nigin momoiya bunem, ã mata walogouf nigin enei itoton.

21

Jesus Gau Yaleyá Bun Memelik Inon

¹ Anĩ dum, Jesus baban in dõ fiya tar gedin, Taiberias daliyoun* wõ yen. Anĩ eig fe wõ yen. ² Simon Pita, Tomas (yana taka Didimus),

* **21:1:** Yana taka are Galili Daliyou.

Nataniel Kana tamal Galili teneub bun, Sebedi gere tar ado, dō fiya tar uru anidim guru de dibodon. ³ Simon Pita idi irokenēdin, “Aya gau nigin ayō fenē.” Idi diron, “Amāg ō geid talauf.” Anī idi dile, waag bun sosō den, anī ere, bō anī bun, gau taka to dalen.

⁴ Bonimeï bagai, Jesus maañ yerin ifaren, anī ere, dō fiya tar idi, Jesusem ya anī to kelein.

⁵ Ī idi iweig irokenēdin, “Mou tar, ã gau taka tau walegel?”

Idi aiten dalen, “Sã.”

⁶ Ī irokenēdin, “Waag siri biya melem kakāg urāg fen, tunī gei gouf.” Idi age difen sain, idi kakāg dī fiya kisi feleya san, ere nigin, gau musei biya.

⁷ Anī in dō fiya tamo Jesus ĩ nigin wau laa fedig ĩ, Pita irokenen, “Are Odugem!” Ī, “Are Odugem,” ye di, Simon Pita karī ye fen, ĩ kolos teten tamal inū inon anī yale, luwa guf fen, naanū ifū iran.

⁸ In dō fiya tar tunī ganān, waag bun disi, kakāg gau isokosen ado dī de dilen, ere nigin, are idi daliyou yeri gerō sã, hundred mita age fiya. ⁹ Sain idi kutū desin, yã kaureya anī bun, gau yã bē bret tunī ado dilen.

¹⁰ Jesus idi irokenēdin, “Ã gau gama bagai walegel tunī urousig.”

¹¹ Simon Pita waag sō ye fen, kakāg dī falaisi, maañ yerin irosin. Kakāg are gau odudug isokosen, gau are 153, gai musei biya, anī ere, kakāg to kokour fen. ¹² Jesus idi irokenēdin, “Usig, saaf wōg.” In dō fiya tar kukī de fen, takam ĩ to, to fiyen, “Ō aim?” Idi keleĩ, are Odug yogo. ¹³ Jesus

isi, bret yale fen, idi ifenēdin, gaug de age fen.
¹⁴ Jesus laa bun tamal kel fã ye fen, in dō fiya tar meleid bun wõ yen are, gama eneim towo fen.

Jesus Pita Baban Wau Yalen

¹⁵ Sain idi saaf dakas fen, Jesus Simon Pita irokenen, “Simon Jon naal, õ aya nigin fatuk waũ laa fef, tunĩ eneidi neid wal fiya de?”

Pita iron, “Odug, momoi, õ keleĩ, aya õ nigin wau laa fef.”

Jesus iron, “Neu sipsip momou ufoutneĩd.”

¹⁶ Baban Jesus iron, “Simon Jon naal, õ aya nigin waũ laa fef de?”

Pita solof iron, “Odug, momoi, õ keleĩ, aya õ nigin wau laa fef.”

Jesus iron, “Neu sipsip kulatun wiyēdiyof.”

¹⁷ Jesus Pita iroken towo fe fen, iron, “Simon Jon naal, õ aya nigin waũ laa fef de?”

Pita wau moron, ere nigin, Jesus ĩ to fiyē towo fen, “Õ aya nigin waũ laa fef de?” Pita iron, “Odug, ereb ereb ganan õ keleĩ, õ keleĩ, aya õ nigin wau laa fef.”

Jesus iron, “Neu sipsip ufoutneĩd. ¹⁸ Aya õ momoi bagai arokonok, sain õ gaun, õ naki rel, ogon oroya dō fen uledig, anĩ ere, sain õ tubau bun, imã walese di, taka nem ifōyo ken, õ to oroyok nē an irouleyōf.” ¹⁹ Pita naig be fe, laaf fen, Negur fula fiya medeĩa ifenēf anĩ nigin, Jesus od enei iron. Age ye fen, Jesus Pita irokenen, “Aya dō wiya!”

²⁰ Pita falei yel fen, dō fiya taka Jesus ĩ nigin wau laa fedig anĩ, dō feid mog, ilen. (Tamo enei bõ saaf yōya bun, Jesus akoron mudur isen ken,

iron, “Odug, aim anĩ õ kiwai ifonõf?”) ²¹ Sain Pita tamo anĩ ile fen, Jesus to fiyen, “Odug, tamo enei ĩ naig foug?”

²² Jesus solof irokenen, “Tamo enei mata ibod mog, aya kelauf anĩ aya orouf aufeg, õ nigin ere yok? Õ de aya dõ wiyauf.” ²³ Enei nigin, dõ fiya tar idi atun, od enei iyokelen, are dõ fiya tamo enei to laa foug den. Anĩ ere, Jesus, tamo anĩ to laa foug ya nigin to iron, Jesus ĩ eig ye iron, “Tamo enei mata ibod mog, aya kelauf anĩ aya orouf aufeg, õ nigin ere yok?”

²⁴ In dõ fiya tamo enei, anĩ ganan wogõ ye fen, itoton. Amã keleĩ, in od are momoi.

²⁵ Jesus ĩ ereb ereb museig age fen. Aya kisi afef, anĩ ganan buk bun ditotlem are, teneub ganan bun modoũ sam.

Mata Ifeněya Ně Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

lxxx

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 11 Nov 2022 from source files dated 22 Nov 2019

d7099f9d-3bdf-5620-8eb3-7e6c51cab7ea